

河南府志

ル 5
1546
12



ル 5
1546
12

河南府志卷之五十六

古蹟志二

都邑二

偃師 鞏 孟津

高辛故都

竹書紀年帝嚳高辛氏元年帝卽位居亳

帝

王世紀帝嚳都亳今河南偃師是也

括地志亳邑故城

在洛州偃師縣西十四里本帝嚳之墟商湯之都也

按高辛所都之亳世紀水經注括地志漢書音義輿地廣記並以爲在偃師獨路史以亳爲南京穀熟高辛之都而以偃師去葛八百亳衆不能往耕饋食爲疑不知湯卽位後自南亳徙西亳未受命與葛鄰義自無礙何氏楷曰書序從先王居孔安國以先王爲指帝嚳也今按其書篇名帝告釐沃告當是通作嚳釐之言來蓋謂從帝嚳而來居于沃土云耳孔說非謬而水經注言帝嚳之墟在禹貢豫州河維間今河南偃師城西二十里

尸鄉是也今考偃師城西二里曰高莊與所謂十四里二十里者不合豈古人約畧計里本未精核耶抑今人所傳高莊未確耶地雖不可確指而要高辛都之為偃師則無可疑耳

殷侯子亥故國

竹書紀年夏帝芒三十三年商侯遷于殷

帝泄十二年殷侯子亥賓于有易有易殺而放之十六年

殷侯微以河伯之師伐有易殺其君綿臣 徐文靖竹書

統箋按商頌宅殷土芒芒鄭箋曰自契至湯八遷始居亳

之殷地據竹書帝芒三十三年商侯遷于殷上距商侯冥

死于河八十有二年此遷殷蓋元冥之子子亥也世本相

土居商王真往河治水子亥遷殷孔甲復歸商王則此遷

殷者正殷侯子亥也孔甲乃上甲之譌國語所謂上甲微

能帥契者元冥之孫子亥之子也計夏后帝芒三十三年

下距湯始居亳之殷地百六十年其時已先稱殷周氏曰

商人稱殷自盤庚始自此以前惟稱商而已今據竹書商

在夏已稱殷安在湯始居殷盤庚遷殷改商曰殷乎山海

經困民之國有人曰王亥托于有易河伯僕牛有易殺王

亥取僕牛郭注云河伯僕牛皆人姓名誤河伯伯爵前所

云河伯洛伯是也僕牛地名也殷侯亥賓于有易托處于

河伯僕牛之地有易乃殺王亥取僕牛如文八年取武成

昭八年取鄭之例不得以河伯僕牛皆為人姓名也又困

民之國郭氏不注襄十四年傳若困民之主墮神絕望社

稷無主將安用之林唐翁注困民之主日困苦其民以主其國山海經困民之國當如是解郭璞日上甲微殷之賢王假師以義伐罪故河伯不得不助滅之前漢書古今人物表帝嚳如簡邊生高尙五世孫冥冥子亥師古曰亥音該據竹書亥即亥也天問該秉季德又作該是亥讀為亥也亥子微滅有易所以報父之讐也國語日上甲微能帥契者也故殷人報焉

按盤庚遷殷說者皆以為在河南偃師實因上甲微之故居則偃師固上甲微所居之殷也而何氏皆以殷地在北蒙即上甲父子之世所謂遷于殷者遂併謂盤庚所遷之殷亦不在偃師是一誤而盡誤矣

商湯西亳故都 地理通釋書序湯始居亳從先王居括地

志云宋州穀熟即南亳湯都也宋州蒙城為景亳湯所盟也河南偃師為西亳湯即位居南亳後徙西亳孔安國帝嚳居亳湯自商邱遷故曰從先王居杜預以景亳為周地河南鞏縣西南有湯亭即偃師也林氏曰鄭氏云亳在河南偃師鄭說可從蓋偃師在河南其地與周邑相近乃四方朝覲貢賦道里取中之地商頌曰古帝命武湯正域彼則頌未必如此

按書序自契至于成湯八遷湯始居亳八遷者契始居商一也昭明居砥石二也相土居商邱三也冥離商邱在河治水四也子亥遷殷五也孔甲之時復歸商邱六也湯自商邱遷亳七也自南亳徙西亳八也然雖有三

毫之名與立政所謂三亳阪尹者自異鄭注三亳謂分毫民爲三色其長居險曰阪尹蓋東成臯南轅轅西降谷也而路史又有五亳之名一杜南一偃師一考城一景毫一鄭地而譙郡南亳不與焉此毫之異名也至杜氏謂鞏縣西南有湯亭實今偃師地不曰偃師而曰鞏縣西南者杜晉人晉省偃師地入鞏故偃師地在晉時率以爲鞏縣西南也

盤庚遷殷

書序盤庚五遷將治亳殷民咨胥怨作盤庚三

篇地理通釋盤庚遷于殷曰先王不常厥邑于今五邦

馬氏曰五邦謂商邱亳囂相耿也林氏曰序言五遷自湯

至盤庚併數之此言五邦又言今不承于古則是盤庚之

前遷者有五攷之前序但有亳囂相耿之四者併盤庚數

之則盤庚歸亳不應謂之五邦太史公謂祖乙自耿遷邢

汲冢紀年謂祖乙遷奄此與序戾不可據意者更有遷而史失之皇極經世盤庚五遷復歸于亳改號曰殷三代世表云徙河南世紀盤庚復南居亳之殷地今偃師是也

按成湯以前已併有殷商之名湯徙西亳不名殷而名商者重王業所自起也盤庚遷殷本名商而必改曰殷者從先王之舊居也至竹書紀年謂盤庚十四年自奄遷于北蒙曰殷何氏徐氏併篤信其說不知紀年雖古信紀年不如信經經曰占我先王將多于前功適于山所謂山者東成臯南轅轅西降谷也夫惟偃師有山北蒙安得有山如是則竹書不足信矣

又按書序成王既伐管叔蔡叔以殷餘民封康叔作康誥酒誥梓材逸書作維篇武王克殷乃立王子祿父守商祀建管叔於東建蔡叔霍叔於殷俾監殷臣及周公相成王誅管蔡俾康叔宇於殷俾仲旄父宇於東左傳武王克商成王定之周公相王室以尹天下分康叔以大路少帛綈旃旌大呂殷氏七族陶氏施氏繁氏綺

氏樊氏饑氏終葵氏封滕土略自武父以南及圃田之北竟取於有閭之士以共王職取於相土之東都以會王之東蒐聃季授土陶叔授民命以康誥而封於殷虛皆啟以商政疆以周索史記衛康叔名封武王同母少弟也其次尚有冉季周公旦以成王命與師伐殷殺武庚祿父以殷餘民封康叔為衛居河淇間故商墟周公乃申告康叔謂之康誥酒誥梓材以命之據書序及逸周書左傳史記皆謂封康叔在成王之世然於誥中稱朕弟寡兄顯考文王等語固未有以解也於是先儒多據經立義以為武王告康叔之書然當武王時封紂子武庚置三監監殷各有分地殷故都猶為武庚有也武王何以明大命于沫邦乎如是則以為武王告康叔者又無以解也竊意史記申告之語乃武王先有誥於前至周公相成王蓋稱述前誥而申之故三篇文多不相屬而康誥前惟三月哉生魄周公初基作新大邑於東國洛四方民大和會侯甸男邦采衛百工播民和見上於周周公成勤乃洪大誥治凡四十八字先儒謂當刪置洛誥篇首今細釋前後文義封康叔而先言作大邑於洛者即度殷攻位於洛者也見士于周者殷民嚮也周成勤者慰勞殷民也洪大誥治者誥也

勞殷民而乃誥康叔者謂康叔能和殷民攻位於洛也康叔所和之殷民即左氏所謂分康叔以殷氏七族也鄭氏詩譜謂武王封紂子武庚為殷後殷民化紂日久未可以建諸侯乃三分其地使三叔尹而教之自紂城而北謂之邶南謂之鄘東謂之衛後三監以叛誅乃於三國建諸侯封康叔於衛使為之長夫管蔡霍皆別有封國則邶鄘衛固非三叔之國武王時但使尹而治之耳邶鄘不詳其始封衛在武王時已封康叔但以康叔幼不使之國使率殷七族於東都故周公營洛得以見士于周迨三監既誅乃使之國逸書所謂成王誅管蔡俾康叔守於殷也武王封康叔已有誥詞周公述武王之詞而復細釋其意以施于沫邦故以為王若曰云云若曰者王之意如此非舊詞盡如是也或曰周公未營洛時王城下都皆未立今謂康叔率殷七族於東都當在何地也曰西亳殷土也地接成周當為康叔之所居今偃師有施谷昭二十六年傳所謂王城人劉人職于施谷者也又有榮錡氏左傳杜註所謂鞏縣西有榮錡澗者今偃師地也榮錡氏當即殷氏七族之錡氏施谷當即殷氏七族施氏之居

商下洛城

春秋繁露湯以神農為赤帝作宮邑於下洛之

陽

按括地志河南偃師為西亳湯即位南亳徙西亳水北曰陽偃師在洛水北故曰陽不曰洛陽曰下洛之陽者據商州有上洛後漢書杜篤傳成周之隆乃即中洛夫上洛商州也中洛成周也則下洛乃偃師也湯徙西亳偃師故春秋繁露以為湯作宮邑於下洛之陽路史以潘城在下洛城西南又以為文昭之分是潘城為周畿內國也今攷偃師西南無潘城而洛陽東南有潘寨潘邨疑即潘城但其去偃師倍乎四十里之數恐非是故水經注以下洛潘城入濕水下彼所謂下洛亦非繁露所謂下洛之陽

周鄔邑

春秋傳隱十一年王取鄔劉為邾之田於鄭莊二

十年王及鄭伯入於鄔遂入成周昭二十四年子朝入

鄔杜注緱氏縣西南有鄔聚

周劉邑

水經注劉水出半石東山西北流于劉聚三百臨

澗在緱氏西南周畿內劉子國左傳杜注緱氏西北有劉

亭路史叟康公邑在緱氏杜云有叟亭或云魯地非也

襄十五年盟于叟地不在周世作劉繆故說文惟有繇然

古亦無之詳字經

按叟繇劉古今字異耳至劉邑杜氏以為在緱氏西北指劉亭而言也水經注以為在緱氏西南通指劉澗而言也

周滑國

路史滑伯爵鄭入而秦滅之今偃師緱氏鎮有古

滑城非滑州弗費也今河南緱氏滑都也與魯費異春

秋大事表滑杜註本鄭邑今偃師縣緱氏故城即古滑地

高氏曰滑本國名秦滅之而不能有為晉所得然其地近鄭在所必爭成十七年鄭人所以侵晉虛滑也是時則歸王室逮定六年鄭伐周馮滑胥靡此鄭人爭滑之驗也

按晉邑和絕秦曰殄滅我費滑羅莘注路史費禹後滑本費城一地也今其地猶名滑城在轘轅西北

周胥靡城 方輿紀要胥靡在偃師縣東南四十里左傳襄十八年楚伐鄭侵費滑胥靡後亦為周邑昭二十六年子朝之亂敬王入于胥靡次于滑定六年伐鄭胥靡乘周大夫儋翩之亂也晉使閻沒戍周且城胥靡即此

按胥靡在偃師東南近滑城今滑城在鞏偃界上滑城東南地盡入鞏則胥靡城當在鞏今鞏地近滑者有曰趙城曰蕭相蕭相者胥靡之轉音也趙城者周城之轉音也特無他確証姑作偃師東南城耳

周侯氏 春秋大事表荀躒軍于侯氏杜註周地即緱氏今

偃師縣東南二十里有廢緱氏城

周東園 春秋大事表單氏伐東園路史周地杜註洛東

有園鄉

按晉時所謂洛東地今盡入偃師

周尹氏邑 春秋昭二十三年傳六月壬午王子朝入于尹

已丑召伯與南宮極以成周人戍尹 路史尹周地尹氏

采杜謂鞏西南偃師今汾州有吉甫墓記即其邑

按吉甫在宣王時故汾州得有尹邑若東遷後尹氏之采按能在汾州乎自以偃師為是

周尸氏 春秋昭二十六年傳五月戊午劉人敗王城之師

于尸氏 水經注班固曰尸鄉故殷湯所都者也故亦曰湯亭晉太康地理記並言田橫死於是亭故改曰尸鄉非也余按司馬彪郡國志以為春秋之尸氏也

周施谷 春秋昭二十六年傳四月戊辰王城入劉人戰於施谷

周萑谷 春秋昭二十六年傳七月丁丑王次于萑谷杜註

周邑 春秋大事表按大谷在今洛陽縣東後漢書孫堅

進軍大谷距洛九十里其谷連亘至潁陽縣何進設八關大谷其一也周之萑谷施谷蓋皆大谷之支徑

按大谷今水泉口其山界洛陽偃師登封三縣地山峻險確確可以置關不能容邑據傳王城與劉人戰

是近劉山谷之邑故入偃師

周止國 路史少昊後偃姓國曰止今首陽北故曰止陽

周紀國 路史紀今緱氏故紀縣周之餘族可見者

漢偃師故縣 水經洛水又東過偃師縣南酈注洛水又東

偃師故縣南與緱氏分水 穀水注穀水又東逕偃師城

南皇甫謐曰帝嚳作都於亳偃師是也王莽之所謂師氏

者也 名勝志偃師故城在縣西十里周武王伐紂回偃

息師戎于此故名

按偃師漢所置晉省入鞏洛故漢桑欽曰偃師縣魏酈道元則曰偃師故縣也隋開皇十六年復置則為今偃師縣治其故縣在縣西十里今辛寨曰辛寨者亦謂高辛故都也又前漢書注偃師莽曰師成而水經注則曰

王莽所謂師氏或疑氏字誤當作師成或疑師字誤當作尸氏吾以為二說皆非也後漢書曰匡師有尸鄉尸鄉在縣西則以為即尸氏者固不可若顏師古注前漢尚在酈道元後亦未見顏精于酈師氏為誤嘗讀皇霸文紀載古真簋銘曰有進後雩邗人正之師氏人云云凡一百五十八字乃知師氏之名蓋古有之王莽篡逆而凡事妄謂反古則師氏之稱固有所自來矣

漢緱氏城史記武帝紀公孫卿候神河南見仙人跡緱氏

城上有物若雉往來城上天子親幸緱氏城視跡問卿得

毋效文成五利乎

漢延壽城水經注休水又逕延壽城南緱氏縣治故滑費

春秋滑國郡都王莽更名中亭即緱氏城也方輿紀要

延壽關縣南二十五里晉永康二年齊王冏舉兵許昌討

趙王倫倫遣兵出延壽關以拒之或謂之延壽城盧氏

嵩山記子晉學道于洛鹿澗澗旁有靈星塢一名延壽城

此塢有道士浮邱公接其登仙之所又漢書李膺罷歸緱

氏教授生徒給事論鄭注于此處

按延壽城即緱氏城在今古潁城城南臨休水水外即緱山自戰國以來為周邑為韓邑為漢縣晉及後魏皆在古滑城非今緱氏鎮也今緱氏乃隋大業所改詳在下

漢袁術城水經注合水注于公路澗世俗音譌號之曰光

祿澗非也上有袁術固四周絕澗迢遞百仞廣四五里有

一水淵而不流故谿澗即其名也

按古謂固猶今謂城也

漢曹公城 名勝志袁術固東去十里有曹公城操與袁術

相拒者

隋偃師縣 方輿紀要隋開皇十六年置大業十三年李密

攻偃師不克即此

按隋縣與漢縣異處見前

隋緱氏縣 名勝志隋大業二年設緱氏縣於公路澗西

崤為城古滑坡在緱氏縣東十六里 方輿紀要緱氏隋

屬河南郡唐及宋皆屬河南宋熙寧初省入偃師

按公路澗之緱氏即今緱氏鎮也

以上偃師

夏伯鄴城 汲蒙周書度邑解自洛汭延於伊汭居陽無固

其有夏之居 名勝志鄴城在鞏縣西南昔禹封夏伯于

此

按周書所謂陽無固者鄴城別名也其地正在洛汭伊汭之間或以陽無固為登封陽城在嵩高南洛汭伊汭俱在嵩高北何得以陽無固為陽城也蓋陽城亦在鄴城封內故禹避舜之子於陽城示欲守舊封之意竹書舜命夏后有事于太室太室鄴山鎮也在禹封內故主其祀迨武周營洛諄諄無遠天室者其亦徵諸鄴城歟鄴于夏又為鄴氏于周又為鄴羅之邑其後或以鄴名或以羅名實一地也于今為羅莊在鞏西南五

夏斟鄩國 竹書紀年帝太康即位居斟鄩畋于洛表羿入

居斟鄩帝仲康即位居斟鄩徐箋按前漢書薛瓚注曰斟

尋在河南汲郡古文太康居斟尋又左傳郊尋注河南鞏

縣有地名尋中括地志故鄆城在洛州鞏縣西南五十八里書序曰太康失邦昆弟五人須于洛汭此即太康之居為近洛也襄四年傳曰夏之方衰也后羿自鉏遷于窮石晉地記曰河南有窮谷羿國于有窮者即此也漢志北海平壽縣臣瓚引汲郡古文太康居斟尋羿亦居之時斟尋又白河南遷北海也孔氏書疏曰羿廢太康猶立仲康不自立則是時羿居斟尋而立仲康故仲康亦居斟尋也

按邵子皇極經世曰仲康崩相繼立依同姓斟灌斟鄩氏二國夏同姓則斟鄩之封當在禹時禹以故邑封同姓守其宗社人民後世遂于此即位耳地里志北海有斟縣郡國志平壽有斟城獨薛瓚漢書注斟鄩在河南非平壽也書序太康第五人後于洛汭是太康之居為近洛也綱目前編謂太康城于甸服東南而居之即今

開封太康縣豈太康居斟鄩又逼于羿而別為是城與水經注于河南鄩地指為鄩城又為鄩中至注平壽則又曰既為依斟鄩明斟鄩非一居未可捨此尋各專彼為是善乎其為通方之論矣

夏有洛氏國 尚書五子之歌太康畋于有洛之表 汲冢

周書有洛氏宮室無常池園廣大工功日進以後更前民不得休農失其時饑饉無食成湯伐之有洛以亡

按太康居斟鄩畋于有洛則有洛國當近鄩城解經者皆言洛表為洛水之濱不知有洛實國名也有洛見于夏初而亡於成湯蓋與夏祚相終始矣

周鞏伯國 水經注鞏故城東周所居本周之畿內鞏伯國也 山河兩戒考注昭二十二年子朝奔京鞏簡公敗績

于京杜注周卿士今鞏縣西南三十里有故鞏城 方輿

紀要左傳昭二十六年晉師克鞏遂王子朝爾雅曰鞏固也四面有河山之固也

按鞏伯之封當在周初鞏簡公其後也為王卿士在東周子朝之亂時又左傳闕鞏之甲武所以克商也路史闕鞏國也是武周以前已有鞏國之舊封矣

周坎氏邑 春秋僖二十四年傳王出及坎猷杜注周地

路史坎氏鞏縣東坎審聚服云鞏東邑

周鄆邑 春秋昭二十三年傳鄆鄆潰杜注鄆鄆二邑皆子

鞏所得水經注洛水歷鄆中水南謂之南鄆亦曰上鄆

鞏洛渡北謂之下鄆亦謂之北鄆有鄆城蓋周大夫鄆盼

之舊邑也 盼左傳作盼 羅水謂之長川羅亦曰羅中蓋盼子鄆

羅之宿居故川得其名耳

按羅為盼之子鄆羅之宿居即鄆盼之舊邑水經注解羅水得名以近鄆羅之居而名之非謂鄆盼羅之居有兩地也

周榮錡氏 山河兩戒考注莊元年王使榮叔來錫桓公命

杜注榮叔周大夫榮氏叔字案竹書成王九年使榮伯錫

肅慎氏命厲王元年王作夷宮命卿士榮夷公落韋昭曰

榮國名馬融曰周同姓畿內諸侯為卿大夫也昭二十三

年王崩於榮錡氏杜注河南鞏縣西有榮錡澗路史以為

即榮國周脾經有榮方戴記宰我問有榮伊

按周有榮叔殷有錡氏二者皆依榮錡生義並存之可也

周石氏邑

山河兩戒考注莊十九年傳石速與五大夫作

亂因蘇氏杜注膳夫石速也周語惠王三年石遯出王而

立王子頹是也水經注洛水又東逕鞏縣故城南又東濁

水注之又東北合洞水水發南谿石泉亦名爲石泉水

鞏縣東南有石子河石蓋其采地也昭三十三年王使

張如晉定十四年天王使石尚來歸服是皆石速之後

按石子河方輿紀要以爲玉仙河今鞏玉仙河水入池不入洛與水經注石泉入洛異鞏又有石河道在鞏西不在鞏東與水經注亦不合據水經注當卽今市河水耳

周皇邑

春秋昭二十二年劉子單子以王猛居于皇左傳

單子以王次于皇鄒肸伐皇杜注河南鞏縣西南有黃亭

水經注京相璠曰訾城北三里黃亭陌宋本作卽此亭也

春秋所謂次于黃者也

按說嵩見水經注黃皇字異以爲次于黃乃登封許由所居之黃城而反疑長人爲誤今據春秋傳單子欲如晉告急以王次于皇晉籍談荀躒賈辛司馬督帥師軍于陰于侯氏于谿泉次于社侯氏卽繼氏近鞏谿泉卽明谿社卽五社津皆鞏地晉人勤王之師俱在鞏而謂皇爲登封之黃城去鞏尚百餘里當不其然

周訾城

春秋昭二十三年傳夏四月乙酉單子取訾

經洛水又東逕訾城北又東羅水注之

按訾城今各訾店俗又譌爲小芝田東北里許爲羅水入洛處在縣西南四十里

周東訾城

春秋昭二十四年傳王子朝用成周之寶珪于

河津人得諸河上陰不佞拘得玉者取其玉將賣之則爲

石王定而獻之與之東訾二十五年傳尹文公涉于鞏焚

東訾弗克

按左傳既別為東訾明東訾與訾不一地杜注乃指為一誤矣路史謂訾有二西訾在洛東訾在鞏雖較勝杜氏而所目之地于傳文亦不合傳謂涉鞏焚東訾則鞏訾不過相隔一水耳晉石勒擊劉曜于洛陽至成鞏卷甲啣枚詭道兼行出于鞏訾之間曰鞏訾之間知鞏訾不相遠也今鞏訾城在故鞏城西與故鞏城相去約數十里是鞏之訾城已為西訾而故鞏城之東必更別稱東訾其地雖不可確指固知二訾俱在鞏不得謂一在洛一在鞏也

周襄宏邑

山河兩戒考注定元年孟懿子會城成周晉女

叔寬曰襄宏違天杜注天既厭周德襄宏欲遷都以延其

祚故曰違天哀三年六月癸卯周人殺襄宏杜注終違天

之禍案子貢詩傳襄宏忠於王晉趙鞅殺之周人傷之賦

有兎左傳及杜注皆以為城周違天之咎謬矣路史姬姓

有襄伯漢書藝文志有襄宏十五篇魏收地形志范陽襄

鄉縣有襄鄉城太康地記涿郡有長鄉古襄長通用今鞏

縣西南有長羅川源出方山

按徐注謂襄長通用鞏之長羅即襄宏之采邑也夫羅既為鄆羅之邑矣何得又為襄宏之邑乎豈鄆羅父子黨子朝子朝奔而邑遂廢歟抑襄宏之邑近羅水而遂名為長羅歟徐氏之說當必有所自出勿庸輕議也

東周君城

名勝志顯王三年西周惠公封少子班於鞏以

奉王號東周

按東周之封在顯王二年而前府續志載考王十有五年西周公封少子云云前後相隔且百年是又讀史公

河南府志

卷之五十一 古蹟志

古

都邑二

周本紀而誤者也周本紀曰考王封其弟於河南是為桓公以續周公之官職桓公卒子威公代立威公卒子惠公代立乃封其少子于鞏以奉王號東周惠公史記本究考王封桓之始末而言之而自桓及惠已至顯王之世矣何得謂考王時已有東周公之封也其故城在今康店縣志謂在孝義尚隔一水矣城半在邙山上半在山下遺趾尚存有鞏王廟鞏未嘗稱王而曰王者豈赧王獻地後東周君保遺民遂私尊為王與又戰國時蘇秦說韓王有鞏洛之險蒙鶩伐韓獻成臯鞏鞏既為東周君而韓又有鞏者知鞏伯之甸半屬東周半屬韓也

漢鞏縣故城 水經洛水又東北過鞏縣東酈注洛水又東

逕鞏縣故城南東周所居也

按桑欽西漢人而曰過縣東則作經時縣猶在洛水西故鞏城也道元後魏人而已目為故城則秦魏以前縣已移洛水南今縣治也方輿紀要謂隋以前縣治洛口蓋隋自今縣治而後非自故城移也

漢小平城 名勝志郡國志云小平城漢縣廢址在今鞏縣

西北有河津曰小平津即城之隅也黃河西自偃師縣界流入於此有五社渡又為五社津後漢朱鮪遣賈強從五社津渡是矣

按小平城在平陰東北平陰在孟津縣故方輿紀要以小平城屬孟津不知小平平陰本非一地平陰故城在今孟津鞏孟接壤故小平城遂入鞏縣其地在今鞏西北裴隘渡裴平音轉故也

漢袁公固 水經注羅水西北逕袁公塢北蓋公路始固有

此也

按水經注曰始固者對偃師袁術固而言也固即城也

隋洛口倉城 方輿紀要隋大業二年于鞏東南原上築倉

可河子志 卷之五十六 古蹟志 五 都邑二

城周回二十餘里穿三千窖窖容八千石亦曰興洛倉十二年以盜賊充斥命移兵守洛口倉城

李密洛口城

方輿紀要李密說翟讓曰洛口倉多積粟去

都百里有餘先無豫備取之如拾遺耳遂襲克興洛倉密稱魏公命護軍田茂廣築洛口城方四十里而居之

李密偃月城

方輿紀要李密臨洛築偃月城與倉城相應

既而與王世充戰于洛北敗走洛南餘眾東走月城唐武德三年世民伐王世充分遣王君廓自洛口斷其餉道今縣東有洛口驛

按偃月城在鞏而洛陽志以為在洛者以偃月與倉城相應也不知所謂倉城者鞏之興洛倉城非洛之同洛

倉城也且同洛倉城亦在孟津不在洛陽詳辨在孟津同洛倉城下

北齊王藥城

方輿紀要在鞏城東北濱河高齊時戍守處

周建德四年宇文憲等入齊境降拔三十餘城歸還皆棄不守惟以王藥城為要害遣將韓正守之正以城降齊

宋永安城

方輿紀要鞏縣西南四十里宋太祖父昭皇帝

墓於此曰永安陵景德中割鞏偃師二縣置邑以奉陵寢後為永安軍自太祖至哲宗八陵皆葬於城西南諸原上

宋南城

方輿紀要宋有永安軍又有南城軍亦在鞏縣西

南紹興二年岳飛遣諸將收復河南楊遇復南城軍張憲復永安軍是也

按南城在今鞏西南七十里
名南邨與偃師古滑城相近

金芝田縣 方輿紀要金改永安為芝田縣元廢

按芝田
今為鎮

以上鞏縣

古赫蘇氏國 路史禪通紀赫蘇氏是為赫晉赫胥氏之治

也尊民而重事光躍赫奕而降名有不居即以胥而自况

九洛秦定爰脫灑於潛山

按孟津志以潛山為即縣之潛亭山又蘇有宜蘇山遂
據以為赫蘇氏國不知路史所謂潛山乃天柱山潛一
作潛孟津之潛一作晉固不得以為一山即路史所謂
九洛秦定亦謂九州治平耳九州何以為九洛蓋九州
之九與制國九區井田九夫同生于洛書九疇之數故
九州得曰九洛孟津志事本路史而實非路史本意故
併表而出之
以著其失

孟涂國 路史夏世侯伯孟涂國隱十一年向盟即孟今

河南孟津偃師西三十一里穆傳至於孟氏近河南

按禹貢又東至于孟津則自夏以前已有孟之名矣秦
誓大會于孟津以武王盟諸侯于此又稱孟為盟左傳
隱十一年王與鄭蘇忿生
之田凡十二邑盟其一也

周平陰 春秋昭二十二年傳晉籍談軍于陰二十三年傳

晉師在平陰 春秋大事表陰即平陰今為河南府孟津

縣地

漢平陰 水經河水又東逕平陰縣北注地理風俗記曰河

南平陰縣故晉地地陰戎之所居又曰在平城之南故曰

平陰也三老董公說高祖處陸機所謂皤皤董叟謨我平

陰者也魏文帝改曰河陰矣方輿紀要浦公北攻河陰絕河津南戰洛陽更始將朱鮪遣兵攻温自將數萬人攻平陰是也

按水經注河水過平陰北又東逕臨平亭北逕洛陽縣北又東逕平縣故城北據是則漢平陰當在今洛陽縣西北光武墳在臨平亭今縣東在光武陵東河水逕平陰北而東過洛陽北臨平北而後至今縣治是平陰尚在今縣治西不下數十里而舊志及方輿紀要俱言漢平陰在今孟津縣東二十里何相去東西不同如此也桑欽西漢人証以目驗非同妄記後人譌舛恐誤以平縣為平陰縣耳

漢平縣故城 水經注漢武帝元朔三年封濟北貞王子劉遂為侯國王莽之所謂治平矣俗謂之小平也有高祖講武場河北側岸有二城相對置中郎府徙諸從隸府戶并

羽林虎賁領隊防之南對首陽山春秋所謂首戴也河水

至是有盟津之曰

按平縣漢所置桑欽在漢時而曰故城是平縣已有移置故入鞏更有小平城也然道元注平縣乃曰俗謂小平何也蓋蓋縣之小平對平縣故城而曰小平縣之謂小平則對平陰之平而曰小也義各有當道元固不謬耳又按平縣故城道元謂南對首陽北直盟津當即方輿紀要所謂今縣治東二十里漢平陰縣也亦曰孟津舊縣實平縣非平陰縣也

漢穀成故縣 漢書地理志穀成注禹貢灑水出晉亭北東

南入維爾古曰即今新安

按今孟津西蘇山南有穀成故縣灑源在其南俗呼其山曰北山考水經注漢穀成西臨穀水在今洛陽西與師古注即今新安者已不同是穀成有三地矣今依水經注而于在孟津者存其名或當時縣有遷徙不可知也

魏河陰

方輿紀要文帝改河津為河陰仍屬河南郡晉因之永嘉五年帝以洛陽危因欲東幸倉垣而衛從不備使傅祗出詣河陰治舟楫不得進而還既而洛陽降祗建行臺於河陰後魏仍屬河南郡太和十八年如河陰觀方澤二十年營方澤于河陰武泰初爾朱榮立子攸于河陽百官奉迎于河橋榮遣騎入洛執太后及幼主送河陰沉之于河東魏分置河陰郡于此其後周武帝攻齊拔河陰大城是也隋初郡廢仁壽末漢王諒舉兵并州遣其將余公理下河內詔史祥領之于河陰祥具舟南岸公理屯河陰亦聚兵當之隋節精銳于下流潛濟公理敗走大業初縣

廢王世充復置又置平州治唐武德四年廢開元三十年始割汜水滎澤二縣地置河陰縣非復平陰舊地矣通典河陰舊城北對河陽岸即此

東魏武濟城 方輿紀要在孟津舊縣東舊傳周武王伐紂由此濟河故名東魏築城于此為戍守處周建德四年大舉伐齊宇文憲拔武濟進圍洛曰拔東西二城是也

東魏回洛城 方輿紀要在孟津舊縣東唐志河陽關南有回洛城東魏元象初侯景初山之戰諸軍皆北渡河橋方俟洛獨勒兵不動魏人惡之而去高歡因名其所營之地曰回洛隋大業二年于其地置回洛倉倉城周回十里穿

三百零十三年李密遣兵襲回洛東倉破之既而據回洛倉大修營塹以逼東都隋出兵拒之戰于倉北隋兵敗走未幾復陳于回洛倉西北密戰敗奔還洛口尋敗隋兵復取回洛武德三年世民攻王世充分遣懷州總管黃君漢自河陰攻回洛城君漢遣其將張夜叉以舟師襲回洛克之世充使其子元應來攻不克乃築月城于其西留兵守之隋紀云回洛倉置于洛陽北七里似誤

西魏栢崖城

名勝志城臨黃河侯景所築唐高祖時滑州

人黃君漢以栢崖城降因置縣肅宗乾元中太尉李光弼修築以拒史思明于此按志栢崖城在縣西三十里

唐河清縣

名勝志郡國記云河清縣唐先天時置以貞觀

初縣界黃河清爲名本武德之太基縣也治栢崖城

金孟津舊縣

方輿紀要縣東二十里金人徙置孟津縣于

此明因之并置巡檢司嘉靖中又徙今治仍置孟津巡檢

司于舊縣治

以上孟津

府志卷之五十六終

志

卷之五十六

古蹟志

字

都邑

古蹟志三

金孟... 天... 二十里... 金人... 置... 縣... 天... 置... 縣... 天... 置... 縣...

河南府志卷之五十七

古蹟志三

宜陽 登封 永寧

古石城 水經注甘水發源東北流北屈逕一故城東在非

山上世謂之石城也

按水經注鹿蹄山在河南陸渾縣故城西北俗謂之縱... 然皆為甘水所出是二山又通得鹿蹄之名矣故方輿... 紀要曰鹿蹄山一名縱山或謂之非山水經注于甘水... 導源山曲以為世人目其所為甘棠與所謂逕一故城... 者自別而舊府縣志遂生甘棠城之名夫召公聽政偶... 然憩息于甘棠之下寧復有城即以為後魏甘棠縣治... 而在道元時亦不得目為故城則甘棠城之稱妄矣至... 所謂石城者即京相璠所謂甘城也在甘水西道元證... 以目見以甘城在甘水東則石城之名在爾時已不能

詳所由來今以甘城入洛陽而于宜陽石城存其名而不詳其代猶前人意耳

周尹氏邑 山河兩戒考竹書幽王元年王錫太師尹氏皇

父命是西周已稱尹氏隱五年王使尹氏助曲沃莊伯杜

注尹氏周世族大夫成十六年公會尹子伐鄭杜注尹子

王卿士子爵傳曰尹武公是也後有尹言多尹文公尹辛

皆其後也昭二十三年王子朝入于尹劉子從尹道伐尹

水經注宜陽縣有共谷共水出焉南流得尹谿口水出西

北尹谷尹氏之采地故取名也

周渠邑 山河兩戒考桓四年夏天王使宰渠伯糾來聘杜注宰官渠氏伯糾名也案昭二十六年傳劉子以王出次

于渠杜注渠周地水經注洛水又東合渠谷水水出宜陽

縣南女几山是渠亦采地也

按渠邑大事表以為陽渠徐氏以為渠谷豈渠伯糾之采邑在渠谷王所次之渠為陽渠本不一地與並存其說可也

周邊伯邑 山河兩戒考莊十九年傳邊伯之宮近於王宮

王取之杜注邊伯周大夫史記周本紀邊伯等五人作亂

是也山海經白邊之山又西曰熊耳之山熊耳在宜陽縣

白邊即在其東或當時邊伯采於是也

周左邑 山河兩戒考僖二十四年王使來告難使簡師父

告於晉使左鄢父告於秦杜注二子周大夫水經注在澗

水東出近川西流注於共水在宜陽縣東左澗卽左鄆父所居之地也

周毛伯邑

山河兩戒考文元年天王使毛伯來錫公命杜

注毛國伯爵諸侯入為卿士者周書克殷解毛叔鄭奉明

水是毛為叔鄭封國書顧命乃同召太保奭芮伯彤伯畢

公衛侯毛公孔傳曰司空第六毛公領之竹書康王十二

年秋毛懿公薨卽書所謂毛公也穆天子傳天子東升於

三道之隘命毛班逢固先至於周郭璞曰毛班

先也竹書穆王三十五年毛伯遷帥師

後也路史河南藉水旁有毛泉近

秦武公十年伐邽縣之其地為今秦州清水縣屬鞏昌府

河南安得近之嘗見宋本水經注於穀水注中藥草蔽翳

不錯以渭水注中渭水又東得歷泉至卽洋水也三百二

十有二字列於其下內有云藉水又東合毛泉谷水又東

逕上邽城南路史不審其誤遂謂毛泉近上邽妄矣案僖

傳云戎伐周獲原伯毛伯注原毛皆采邑是有毛城毛城

在河南也

周陰邑

山河兩戒考襄十有二年齊侯許昏王使陰里結

之杜注陰里周大夫後有陰忌陰不佞案隋志河南宜陽

縣有陰山水經注太陰谷水南出太陰谿北流注於洛洛

水又東合白馬谿水出宜陽山澗是也

韓宜陽城 方輿紀要宜陽城韓城也蘇秦說趙曰韓弱則效宜陽宜陽效則上郡絕說韓曰韓西有宜陽商阪之塞張儀曰秦攻新城宜陽以臨二周之郊又說韓曰秦下甲據宜陽斷韓之土地蘇代曰秦起乎宜陽而觸平陽皆謂此也又周王曰宜陽大縣也宜陽城方八里材士十萬秦惠文王三年拔韓宜陽旣而韓復取之又武王四年使甘茂伐宜陽五月而不拔大起兵拔之蓋澗池二峭實皆在宜陽境內爲控扼之要地孔氏曰在宜陽韓之大郡伐取之三川路乃通漢置縣于此光武降劉盆子積甲宜陽城

晉大安二年河間王顥舉兵關中遣其將張方取洛陽長沙王又使皇甫商將兵拒之宜陽爲方所敗永嘉二年劉淵遣其子聰等寇洛陽長驅至宜陽宏農太守桓延襲敗之未幾淵復遣子聰自宜陽寇洛陽周齊時爲東西必爭之所後周天和四年遣宇文憲等將兵趨宜陽築崇德等五城五年齊斛律光救宜陽屢敗周兵築統開豐化二城而還六年周宇文純復取宜陽等九城斛律光引兵爭之與周師戰于宜陽城下取周建安四戍四戍亦在宜陽城側隋義寧二年唐公淵遣世民攻東都東都不應引還東都將段達來追世民敗之逐北至城下置新安宜陽二郡

留兵戍之而還

名勝志縣在宜水之北水北曰陽故名

宜陽後漢書赤眉樊崇與劉盆子遇光武于宜陽其西城門即奉光武璽綬處也

按韓城為宜陽故城即水經注所謂洛水又東逕宜陽故城南也然水經于故城上已曰過宜陽縣南皆非今治且二城注亦不甚別白似相去不遠俱在洛水南故方輿紀要于宜陽故城亦不為別白並取秦漢以後及唐初事屬之今攷水經既有二城則今之所謂韓城者乃東周及秦之宜陽故城漢以後之宜陽城當即神后寨不得目為一地耳韓城今為鎮在縣治西五十里

漢眉城

宜陽縣志眉城在趙保漢建武三年築此御赤眉

按秦漢以來宜陽所屬通新安澗池之南境并永寧而有之今據歷代史志沿革及水經注所列宜陽故城凡有六而一以今縣所屬分隸之如水經注所謂龍驤城金門塢舊宜陽縣治及西魏所置北宜陽縣俱宜入承

寧水經注所謂蠡城邑故澗池縣治者宜入澗池至所謂八關都尉官治宜陽縣志目為八關城今宜入新安其現屬宜陽者則有宜陽故郡為舊陽市邑一合塢故于父邑及福昌壽安甘棠興泰九曲栢谷等或各為一地或相沿一地并為臚列如左

後魏宜陽故郡

水經注昌澗水出西北宜陽山而東南流

逕宜陽故郡南舊陽市邑也故洛陽都典農治此後改為

郡

按魏書地形志宜陽郡興和中置而水經注已稱宜陽故郡則置郡更在興和以前矣然道元不詳改郡之時今亦不見改郡之地姑闕之以俟知者

後魏甘棠縣

方輿紀要後魏置甘棠縣屬新安郡

按紀要以甘棠縣在今縣治東南而宜陽志以為即今宜陽縣治且志又有甘棠城以為即今甘棠寨今攷甘

河南府志

卷之五十七古蹟志

都邑三

棠舊縣於今縣治東南已不能目其地即以今縣治當之猶在洛水南也至志所謂甘棠寨者直圖入洛水北何也蓋隋改甘棠為壽安又移壽安于九曲九曲據水經注在洛水北則今洛水北之甘棠寨乃九曲城非甘棠城也而縣志又以九曲為在縣東南泊頭保何顯與水經悖如斯耶在南之甘棠而妄指為北在北之九曲而妄指為南山山川不改書史俱存必有能辨之者

東魏陽州城

方輿紀要後魏末置宜陽郡東魏兼置陽州

天平四年州降于西魏後周又改熊州隋大業初州廢

按宜陽縣志陽州城在縣西西坊保東

北齊九曲城

方輿紀要高齊置城于此以備周亦曰九阿

水經注洛水自宜陽而東逕九曲南其地十里有阪九曲穆天子傳所謂天子西征升于九阿是也劉昫曰熊州壽

安縣隋義寧元年移置九曲城唐武德二年王世充與唐兵戰于九曲秦叔寶來降三年熊州總管史萬寶邀敗世充子元應于九曲是也

北周栢谷城

方輿紀要在縣南後周所置以防齊北史高

齊武成初斛律光出洛陽擊斬周將曹回公栢谷戍主薛禹生棄城走光遂取文侯鎮立柵置戍而還鎮蓋與栢谷城相近又天和五年宇文憲與斛律光爭汾北齊將段韶等攻周入栢谷城拔之而還

隋壽安城

方輿紀要隋仁壽四年改甘棠曰壽安義寧初

移置九曲唐貞觀七年復移治此改屬洛州宋因之金廢

杜佑曰齊孔城防蓋置于壽安縣

隋興泰城 方輿紀要在縣東南隋大業四年置興泰縣屬河南郡隋末廢唐長安四年立興泰宮復析置興泰縣神龍初省入壽安

按宜陽縣志興泰城在趙保鎮南遺址尚存

唐福昌城

水經洛水又東北過于父邑之南酈注洛水又

東逕一合塢南城在川北原上高二十丈南北東三籍天嶮峭絕惟築西面即為合固一合之名起於是矣劉曜之將攻河南也晉將軍魏該奔于此故于父邑也 方輿紀要福昌城杜佑謂即故一合塢晉永嘉末魏浚屯洛北石

梁塢族子該聚眾屯一泉塢大興初該始自宜陽帥眾南遷新野蓋其地險固可雉也水經注名一合塢晉書一泉塢在宜陽西南洛水北原上又名乙泉戍慕容暉時戍此以備秦晉太和四年慕容垂奔秦乙泉戍主吳歸追之至閭鄉是也宇文周時亦置重兵于此以備齊唐初置宜陽縣改曰福昌

按水經注于一合塢曰城在云云是漢晉以前已有城也但不詳築于何時故以唐福昌城為斷據縣志在福昌頤真觀西遺址宛然而又別有金塢城即一合塢與福昌城實異地存之以備參考

唐穀州城 方輿紀要唐貞觀初廢熊州以福昌屬穀州置此顯慶初穀州廢

按宜陽縣志穀州城卽今神后寨

以上宜陽

古陽城 史記顏師古注帝堯定巡狩之制周流五嶽遊於

陽城 孟子禹避舜之子於陽城朱註陽城嵩山下深谷

可藏處 竹書紀年夏道將與祝融降于崇山都于陽城

徐箋崇嵩字古通用禹在陽城蓋避舜子非都也 方輿

紀要戰國初屬鄭謂之陽城史記鄭君乙十一年韓伐鄭

取陽城

按陽城在縣東南三十里爲告成鎮方輿紀要以禹避陽城爲今縣治周以後乃入陽城而不知周之陽城猶因于古其時固無今縣治也今列古陽城取周以前事繫之自秦以後則別繫于陽城縣下非有異地以縣之名始于秦耳詳在下

古負黍 路史負負黍世紀舜遷於負黍按少室一曰黍室

負黍城在其南定六年之負黍也杜云陽城西南有負黍

亭今在登封 馮敬通顯志賦遇許由于負黍

按負黍卽負夏在少室南今爲大金店縣治西南三十餘里遺址尚存土人呼城子據敬通賦許由亦隱此豈負黍卽黃城歟而負黍西又別有黃城詳在下

古黃城 路史黃城許由隱處 雜道書堯聘許由壇墀也

謂之黃城

按說嵩以黃城卽今縣治西五十里之黃城溝城址依稀尚存直馬鞍山南

夏狂國 路史狂夏后臣章律狂章按經有狂水逕綸氏城

在今陽城有狂氏宋大夫狂校

按狂水之名說者以為衆水皆東此水獨西故曰狂而路史又有狂國之名不知國以水名與抑水以國名與併存其說可也

夏綸國 [竹書紀年] 少康自綸歸于夏邑 [春秋哀元年傳]

伍員曰少康逃奔有虞虞思於是妻之以二姚而邑諸綸有田一成有衆一旅能布其德而兆其謀以收夏衆 [竹

書紀年] 楚吳得帥師及秦伐鄭圍綸氏 [寰宇記] 潁陽本

夏綸國地 [盟會圖] 疏虞邑在洛之嵩陽漢輪縣屬潁川

按竹書左傳所謂綸者在今登封縣潁陽鎮路史以綸為今宋虞城之綸邑而以寰宇記為誤不知虞思妻少康而邑諸綸綸近陽城在禹邾城舊封之內故得以收夏衆而戮篡賊綸固不必為虞思邑也且春秋時已有綸氏之名漢後置縣或曰輪氏或曰綸氏字本通用路史以寰宇記為誤輪為綸而不知固未嘗誤也至史記

秦攻韓緱氏蘭或曰蘭即綸二邑蓋相近夫蘭綸既非一字今無蘭地自當闕疑不必以綸實之綸氏又為潁

陽詳在下

古郛城 [名勝志] 郛城在縣東南二十八里古郛城縣也路

史云是城為南郛太原為箕郛

按登封陽城唐萬歲登封初改曰告成謂登封太室告成功也名勝志據路史以為古郛城告加邑成加城告成功之意已非似屬附會今存其名而論辨之仍存告成名于陽城縣下

周潁邑 [方輿紀要] 陽城本周之潁邑左傳昭元年晉趙孟

自鄭還周景王使劉定公勞趙孟於潁九年晉梁丙張趯

率陰戎伐潁

秦陽城縣 [方輿紀要] 秦陽城縣陳勝陽城人也二世三年

可南守志 卷之五十二 古蹟志 都邑三

沛公自洛陽東還至陽城漢二年漢王使韓襄王孫信急擊韓王鄭昌于陽城昌降漢置縣屬潁川郡東漢永平六年幸陽城初平二年袁術表孫堅領豫州刺史屯陽城堅擊昂走之晉仍為陽城縣屬河南郡義熙十二年劉裕伐秦使新野太守朱超石等趣陽城後魏亦曰陽城縣孝昌二年置陽城郡隋開皇初郡廢十六年置嵩州于此仁壽四年州廢大業初縣屬河南郡唐初仍置嵩州貞觀三年州省縣仍屬洛州登封初改曰告成縣神龍初復曰陽城旋復曰告成五代周顯德五年省入登封

秦潁陽城 **方輿紀要**本秦邑沛公南攻潁陽屠之漢置潁

陽縣屬潁川郡章帝封祭遵為潁陽侯又封馬防為侯邑建初八年幸潁陽是也晉省

按秦迄晉之潁陽城非今之所謂潁陽鎮也今潁陽鎮乃後魏移置之潁陽為古綸氏地尚在潁水西三十里外安得曰潁陽秦迄晉所謂潁陽者據說嵩度青烟嶺而南左襟少陽溪右肘顧家河潁水橫帶其前土田腴茂平曠夷廓小金店西有古城遺址是已其地在今縣治東南二十五里

漢散國 **路史**散陽城武帝封

按路史陽城有三濟陰陽城汝南陽城與潁川陽城別何以知散為潁川陽城也蓋路史于他陽城封國則繫以陽城某地而散則但曰陽城知為潁川陽城無疑也

漢密高縣 **地理志**武帝置以奉太室山隸潁川郡 **方輿**

紀要西漢置密高東漢省入陽城東魏又于縣置中川郡

後周郡廢大業初曰嵩陽王世充置嵩州于此唐初因之
貞觀中州廢登封元年改今名神龍初復曰嵩陽旋改
屬河南府

按密高中川嵩陽嵩州皆今登封縣然非今
城其地在今登封縣治西北尚有古城遺址

漢東谿縣 **名勝志** 潁水又東過東谿縣漢武帝置以奉太

室山俗謂之崧陽城谿流灌注春夏恒溢雖陽旱輟津石

潭不耗道路游憇者惟得飧飲而已無敢澡盥其中

按漢書地理志潁川但有密高武帝置以奉太室山別
無所謂東谿縣者而名勝志列東谿縣何也蓋名勝志
讀水經注而誤耳水經注曰五渡水導源崇高縣東北
太室東谿縣漢武帝置以奉太室山俗謂之崧陽城本
文以東谿截句謂五渡水導源崇高東北太室東谿也
又注縣所起而曰縣漢武帝置以奉太室山俗謂之崧

陽城所謂縣者即密高縣名勝志誤以縣字截句遂生
東谿縣之稱至崧陽即嵩陽崧嵩古通嵩陽置于隋在
道元時俗已有此稱古人置縣多因舊名固不得
謂水經注有崧陽城遂謂嵩陽置縣在隋以前也

魏康邑 **水經注** 潁水又東出陽城關歷康城南魏明帝封

尚書右僕射衛臻為康侯此即臻封邑也

後魏潁陽城 **魏書地形志** 中川郡領縣潁陽天安二年置

按魏獻文帝天安間始於綸氏城置潁陽縣夫潁陽縣
之於東西漢三國魏所從來久不自魏始也曰始置則
舊潁陽固
不在此

後魏堙陽城 **地形志** 中川郡領縣堙陽太和十三年分潁

陽置 **水經注** 湮水又西南逕湮陽亭東蓋藉水以名亭

也又東南流入于狂狂水又西逕湮陽城南

按埋陽城在
今潁陽鎮西

後魏康城 地形志陽城郡領縣康城孝昌中分陽城置有

陽城關箕山許由隱窟 方輿紀要康城廢縣在故陽城

南

後魏武林城 水經注湮水出湮谷西南流逕武林亭東北

又逕逕其亭南 隋書地理志開皇六年改潁陽為武林

十八年改曰輪氏

按武林之名見于水經注是後魏時已有武林矣然魏志不見而見于隋志豈魏志有闕與抑魏時但有亭至隋乃縣之與隋改潁陽為武林潁陽即故輪氏城故又改輪氏

後魏當階城 水經注狂水逕湮陽城南又西逕當階城南

方輿紀要當階城在湮陽西或曰後魏所置

按當階魏志所無故紀要或以疑之

唐洧源縣 唐書地理志武德三年置密州并置洧源縣四

年州廢省洧源

按洧源縣在今登封東界上大台鎮

以上登封

周武氏邑 春秋隱五年武氏子來求賻杜注武氏子天子

大夫之嗣也 水經注元滬之水出于元滬之山逕于陽

虛之下又東合武里水水南出武里山東北流注于洛

按陽虛元滬俱在永寧西則武里亦當在永寧西山河兩戒考以武里為武氏邑而又云武山在濟源縣固兩存其說矣未知孰是

漢金門城

水經注金門山多重固在韓建武二年強弩偏

將軍陳俊轉聲

當作擊

金門白馬皆破之

方輿紀要金門

城以金門山名後漢延熹二年以誅梁冀功封尚書令李

瑋為金門亭侯即此處也

按紀要以金門城入宜陽今攷金門宜在永寧

晉龍驤城

水經注洛水又東逕龍驤城北龍驤將軍王鎮

惡從劉公西入長安陸徑所由故城得其名

方輿紀要

龍驤城在永寧縣西四十里

西魏北宜陽縣

方輿紀要永寧為漢澠池之西境西魏于

黃墟置北宜陽縣後改熊耳縣

東魏金門縣

魏書地形志宜陽郡領縣金門興和中置

按魏書有金門郡又有金門縣別屬宜陽郡不屬金門郡皆興和中置是郡與縣不同地矣其因漢金門城者為郡為縣不可知故別列之

東魏金門郡

水經注洛水右會金門溪水南出金門山

北逕金門塢西北流入于洛

魏書地形志金門郡興和

中置 方輿紀要永寧縣西三十里有金門塢或以為金

門郡城也

東魏北陸縣

地形志金門郡領縣一北陸興和中置

後周同軌郡城

隋書地理志後周置同軌郡開皇中廢

方輿紀要同軌在永寧縣東西魏置同軌防于此大統十

五年高澄至洛同軌長史裴寬與東魏將彭樂戰為樂所擒後周為郡通典永寧縣後周置黃櫨同軌永昌三城以備齊唐武德三年移縣治同軌城又莎柵亦在縣東唐乾元上元間衛伯玉等屢破史思明將李懷仁于永寧莎柵之間竇應初僕固懷恩等蕃漢兵討史朝義于東京軍于同軌城

按同軌遺址永寧志謂不知所在據紀要謂在縣東北四十五里有城頭邨未知是否

後周熊耳縣 隋書地理志熊耳後周置 方輿紀要後周移于劉塢屬同軌郡隋徙治同軌城義寧二年又移于永寧唐初復移治同軌城屬熊

州貞觀初改屬敷州又移治莎柵後又移治鹿橋驛顯慶初改屬洛州宋屬河南府

按熊耳山在今陝州永寧澗地界熊耳故城當即今永寧故縣鎮在治西北界上而永寧之名則始于隋後屢移治今縣治實鹿橋驛

唐函州城 唐書地理志武德三年以永寧嶠置函州八年州廢以永寧隸熊州嶠隸陝州

按永寧志函州城遺址在縣北四十里大宋川刀環川之間今無可考

唐長水城 唐書地理志本長淵隸宏農郡義寧元年更名武德元年隸號州貞觀八年隸敷州顯慶二年來屬有錫西有高門關松陽故關鵠故關

按永寧縣治西有長水鎮去縣治四十里

唐峭縣城 **方輿紀要**後魏太和十一年置縣屬恒農郡以二峭山而名隋大業初并縣入熊耳唐初復置舊唐書武德元年復置峭縣三年屬函州自硤石塢移置鴨橋八年改屬陝州開元十四年移置硤石塢改曰硤石縣而舊峭縣為石濠鎮五代劉智遠自太原南下至陝州明日至石濠是也

按永寧志謂峭縣城在縣治西北九十里而遺址無存攷永寧西有舊縣未知是否

以上永寧

河南府志卷之五十七終

河南府志卷之五十八

古蹟志四

都邑四

新安 澠池 嵩

周要邑

春秋昭二十二年傳子朝帥要餞之甲以逐劉子

杜注二邑名

春秋大事表要邑水經注畛水出新安縣

青要山

周餞邑

春秋大事表新唐書河南郡諸府有餞濟

按餞與要當相近故併入新安

周墻邑

春秋昭二十三年傳劉子取墻人直人 **路史**齊

墻也今河南府新安縣東北有白墻邨

按白牆在今新安北二十里

周直邑

春秋直人杜注子朝邑直伯柄國

路史有虞氏

後直柄國周地

按直邑亦當與牆邑相近

秦白起城

水經注穀水又東逕白起壘南當作白起戴延之西

征記云次至白超壘去函谷十五里築壘當大道左右有

山夾至疑作夾壘相去百餘步從中出北乃故關城非所謂白

超壘也是壘在缺門東一十五里壘側舊有塢故治宮所

在魏晉之日引穀水為水治以經國用遺跡尚有當作在

按新安縣志白起城縣西三十里鳳山北故址尚存

秦新安城 括地志秦新安故城在今澠池縣東二十里項

羽夜擊坑秦卒二十餘萬人于新安城南蓋在其地

按括地志既以為在今澠池縣東二十里則宜入澠池以新安起于秦故記之

漢新安城 方輿紀要秦新安在今澠池是後東徙後漢建

武二年赤眉自三輔引而東帝遣軍分屯宜陽新安以要

其還路晉永寧二年河間王顥舉兵長安罪狀齊王冏遣

其將張方趨洛陽軍新安大寧二年石勒將石生擊斬劉

曜河南太守尹平于新安東魏天平四年魏獨孤信取新

安通洛陽隋義寧初劉文靜等出潼關克宏農郡遂克新

安以西

按漢以後之新安即今縣治而前漢書河南郡穀城注師古曰即今新安夫漢穀城既為今新安似漢新安猶在今新安之西然水經注方輿紀要以穀城為近河南縣則穀城宜入洛非今新安治也又新安志謂舊穀城在縣東北二十里今其地在仰山上不臨穀水與水經注所謂城西臨穀水故縣取名者自異地疑新安東北故城乃穀州城非穀城縣也詳在下

漢函谷關城

水經注穀水逕函谷關漢元鼎三年樓船將軍楊僕徙關于新安即此又東北逕函谷關城東

見穀八水下

關即今所謂散關楊僕家僮所築靈帝中平元年以河南

尹何進為大將軍五營士屯都亭置函谷等八關函谷為

之首在八關之限故世人惣其統目有八關之名

見洛水下

按水經注函谷關城見穀水下八關城見洛水下穀水洛水中關城似關城有二而杜佑謂函谷為八關首

總名八關城何也蓋關塞自南山橫洛水北屬于河城阻塞垣應在山上穀水逕其北洛水逕其南故水經注兩見之而實一城也

晉東垣縣

宋書州郡志東垣注晉太康地志有東垣縣

方輿紀要在縣東晉大元十一年苻丕敗奔東垣謀襲洛

陽晉將馮該自陝邀擊斬之或以為即新安東垣也元熙

元年時劉裕將篡宗室多逃上在河南司馬道恭帥三千

八屯金墉城西宋武入洛置東垣縣後魏及後周皆置東

垣縣隋大業初改東垣曰新安唐武德初仍置東垣縣四

東垣晉志不列而見于宋書實晉縣也晉志闕耳

五代宋西東垣縣

宋書州郡志晉江左以來司隸淪沒戎

寇武帝北平關洛河南底定直司州領河南郡凡十一縣

西東垣新立

按西東垣與東垣新安并立宜在新安地

後魏新安郡

魏書地形志新安郡興和中置領縣三西垣

新安東垣

按新安為郡始于後魏郡治即今新安縣治至所謂西垣者即宋之西東垣也

後周中州城

隋書新安注後周置中州及東垣縣州等廢

隋置穀州

按中州廢而後置穀州則中州治即穀州治也穀州見下

隋穀州城

隋書地理志開皇十六年置穀州仁壽四年州

廢

唐書地理志義寧二年以縣置新安郡武德元年曰

穀州以熊州之澠池隸之

按新安志穀州城在縣東北二十里

隋慈澗城

唐書王世充傳高祖詔秦王率兵攻之至新安

屯保多下敗世充于慈澗城

方輿紀要慈澗縣東三十

里水經注少水出新安南山中控引眾流積以成川東流

注于穀世謂慈澗唐武德三年羅士信圍慈澗王世充使

其子元應救之敗却是年世民討王世充士信將兵圍慈

澗既而世民自新安進至慈澗世充拔慈澗之戍歸洛陽

是也

唐長泉廢城 唐書地理志絳州垣縣注武德二年置長泉

縣四年以長泉隸懷州後省

按今新安縣黃河南岸有長泉郵蓋唐之長泉縣也與黃河北岸王屋相對故舊隸懷州新安志不知長泉即縣名而以爲河清廢縣河清舊治在孟津後宋移河清于白坡亦爲今孟津縣地不得入新安

元少城 新安舊志元至正三年義軍劉奉屯軍于此內有

少城故址尚存在縣東四十里孝水舖城周五里

按孝水舖在孝水西慈澗少水東少城以少以上新安水得名少水在慈澗則少城疑卽慈澗城也

周陽壺城 春秋襄元年傳晉人以宋五大夫在彭城者歸

真諸瓠邱杜注晉地河東東垣縣東南有壺邱

按壺邱亦曰陽壺在澗池縣治北百二十里北臨河有陽壺郵

戰國秦趙二城 水經注穀水又東逕秦趙二城南世謂之

俱利城耆嘏曰昔秦趙之會各據一城秦王趙王鼓瑟蘭

相如令秦王擊在處也 名勝志俱利城在縣西十三里

俗名東西城相去里許

秦澗池城 方輿紀要秦時故城在今縣西秦二世二年章

邯鄲賧陳涉將周文文走次澗池

漢黽池縣 前漢書地理志宏農郡黽池縣高帝八年復黽

池中鄉民景帝中二年初城徙萬家爲縣莽曰陝亭 水

經注景帝因峭黽之池以目縣亦或謂之彭池續漢書赤

眉從黽池自利陽南欲赴宜陽馮異又破赤眉于是川故
 光武璽書曰始雖垂翅回溪終能奮翼黽池可謂失之東
 隅收之桑榆者矣 [方輿紀要城在今縣西後漢中平末
 董卓爲何進所召軍至黽池初平二年董卓爲孫堅所敗
 自洛陽却退黽池聚兵于陝堅入洛陽分兵出新安黽池
 間以要卓既而卓使董越屯黽池引還長安晉永興三年
 東河王越等遣軍迎車駕于關中以周馥爲司隸校尉假
 節督諸軍屯黽池永嘉四年劉聰遣子粲等寇洛陽自大
 陽濟敗監軍崔邈于澠池長驅入洛州此皆故澠池也
 名勝志郡國志云漢黽池城與澠池水源南北相對

按澠池志治西北十五里有馮異城漢澠池城也然漢未城時爲中鄉地與秦澠池城爲一地否不可知

魏蠡城徙治

水經洛水又東過蠡城邑之南注城西塢水

出北四里山上原高二十五丈故黽池縣治南對金門塢
 名勝志曹操移縣西六十五里之蠡城賈逵爲令時所
 理也 [方輿紀要澠池舊理蠡城姚秦以宏農太守戍焉
 劉裕伐秦王鎮惡進軍澠池遣毛德祖擊擒秦將尹雅于
 蠡城是也今縣西有蠡城驛水經注蠡城南對金門塢塢
 屬永寧縣以洛水爲界

按澠池志有蠡吾城據水經但有蠡城之名魏嘗徙治故道元以爲故澠池縣今縣西有蠡城驛非蠡吾城蠡吾自在齊州縣志誤

晉千秋亭城水經注穀水又東逕新安縣故城南北夾流而西接峭岬又東逕千秋亭南其亭壘石為垣世謂之城也

按千秋亭既有城名宜為新安故城堡固之所今治東二十五里有千秋鎮是矣其新安故城已見新安更詳後西新安縣下

後魏澠池郡魏書地形志澠池郡興和中置領縣三北澠池俱利西新安又宜陽郡領縣三有南澠池

按魏書所謂北澠池者漢澠池故城也所謂俱利者秦趙二城也所謂西新安者水經注之新安故城也所謂南澠池者魏所徙之蠡城也俱在今澠池治內西新安今名搭泥鎮

周河南郡隋書地理志澠池注後周置河南郡大象中

廢方輿紀要後周大象中廢澠池河南郡以縣屬洛州

隋因之尋移治大塢城義寧二年屬宜陽郡唐初屬穀州

貞觀初移穀州治三年又移縣治雙橋即今治

按後周置河南郡于澠池所謂澠池因後魏之北澠池隋後移治不一至唐貞觀乃移今治至今相沿不改方輿紀要謂隋移治大塢自後周澠池移來而各勝志又謂隋大業初已先移縣東二十五里新安驛十二年乃移理大塢城較紀要更加詳

隋洛水縣隋書地理志後魏置南澠池縣後周改曰昌洛

開皇十八年改昌洛曰洛水大業初省洛水入宜陽

按昌洛洛水即南澠池舊治南澠池為今澠池之蠡城則洛水縣宜入澠池而方輿紀要入宜陽蓋因大業省洛水入宜陽而誤也

唐穀州城

唐書地理志貞觀元年徙穀州來治澠池

名

勝志穀山在縣南穀水出于其下唐初兼置穀州與縣共理

唐天池縣

澠池志貞觀二年改澠池為天池屬河南府五

代復為澠池屬河南府

按唐書地理志及通典通志澠池無改天池之文方輿紀要謂天池在縣南貞觀十八年改于澠池之天池水經注熊耳山際有池池水東南流入洛水側有一池世謂之澠池天池蓋進宜陽西北境據紀要以天池為別一池亦不以天池為澠池改縣縣志不知何據

金韶州城

名勝志韶山在縣北二十里左右兩峰狀如日

月金置韶州蓋以此山名矣

金利津城

澠池志皇統初改澠池為韶州以南村為利津

縣今南村在治北百二十里置巡檢司焉 以上澠池

古伊國

路史炎帝後姜姓國伊蓋亦上世所國今洛之伊

陽縣有伊水堯之母家伊侯國 綱目前編堯生於伊故

為伊祁氏

夏有莘氏國

水經伊水又東北過陸渾縣南注昔有莘氏

女采桑於伊川得嬰兒於空桑中言其母孕於伊水之濱

夢神告之曰曰水出而東走母明視而見曰水出焉告其

鄰居而走顧望其邑咸為水矣其母化為空桑子在其中

矣莘女取而獻之命養於庖而長有賢德殷以為尹曰伊

尹也

按伊母化空桑事甚不經然謂有莘女采桑伊川得之則有莘之居必近伊川今陝州有莘原去嵩之伊川尚數百里恐非是

周南邑

春秋隱九年春天王使南季來聘

山河兩戒考

注白虎通文王第十子南季載後也水經注涓水逕陸渾縣故城北東南流左合南水水出西山七谷南氏食采處也

周揚戎邑

春秋僖十一年傳夏揚拒泉臯伊維之戎同伐

京師昭二十二年傳劉子奔揚

大事表揚杜注周邑路

史謂即山西之揚侯國宣王子尚文所封今山西平陽府

洪洞縣東有揚城案傳云壬戌劉子奔揚矣如劉劉為今偃師縣劉亭浹日即至其地當不出百里外山西洪洞距偃師絕遠且地已屬晉決當為僖十一年揚拒泉臯之揚而非山西之揚侯國也

按戎邑在周地者拒戎入商洛泉與伊維戎入洛陽揚戎臯戎在今嵩縣臯戎見下

周臯戎邑

山河兩戒考注國名記有臯戎山海經放臯之

山明水出焉南流注於伊唐志河南陸渾縣有鳴臯山臯戎之故居也

按今嵩縣外有鳴臯鎮

周陸渾戎邑

春秋僖二十二年傳秋秦晉遷陸渾之戎于

伊川宣三年楚子伐陸渾之戎杜注陸渾允姓之戎昭九年晉帥陰戎伐潁杜注陰戎陸渾之戎昭十七年晉荀吳帥師涉自棘津使祭史先用牲於洛陸渾人弗知師從之庚午遂滅陸渾數之以其貳於楚也陸渾子奔楚其衆奔甘鹿

按陸渾戎在今嵩縣陸渾故城又春秋哀四年傳蠻子赤奔晉陰地杜注河南山北自上雒以東至陸渾皆陰地而于陰戎曰陸渾之戎今嵩縣又有陰城則陸渾故城為漢縣未必即戎邑也

周蠻子國春秋成六年傳晉衛鄭伊雒之戎陸渾蠻氏侵宋杜注蠻氏戎別種也河南新城縣東南有蠻城水經注伊水又東轉逕新城縣南故蠻子國縣有鄆聚今名蠻

中山河兩戎考注昭十六年楚子使然丹誘戎蠻子殺之遂取蠻氏呂覽晉令楊子將卒十二萬涉於棘津襲聊阮蠻氏滅三國焉晉志河南陸渾縣故蠻子國似誤以陸渾蠻氏為一

按通志蠻氏都麻解地近伊關今嵩志有麻解城

周老氏邑山河兩戎考注春秋昭十二年傳老陽子杜注周大夫水經注新城縣西北有老倒澗老倒澗水西流入

於伊
周汝濱城名勝志魯昭公十七年晉取陸渾之地築城守之城汝濱今仍名汝濱城

按汝水在嵩縣南縣志又名汪城在汝水北其地瓦礫猶存

周高都城

竹書紀年顯王十五年東周與鄭高都徐箋與

鄭高都者正東周惠公時也史記音義曰河南新鄭縣有

高都括地志高都故城在洛州伊闕縣北又按國策曰雍

氏之役蘇代謂周君曰代能為君令韓不徵粟與甲于周

又能為君得高都遂往見韓相公仲而與高都是高都卒

歸周也水經注伊水又北會厭澗水水出西山東流逕

邠垂亭南春秋所謂邠垂服虔曰邠垂在高都南杜預釋

地曰河南新城縣北有邠垂亭司馬彪郡國志曰新城有

高都城今亭在城南七里遺基猶在京相璠曰舊說言邠

垂在高都南今上黨有高都縣余謂京論疎遠未足以證

無知羣說之旨密矣

知羣當作如虔

按高都城嵩志以為即今縣治今據邠垂在高都南新城在邠垂東南今縣治東北故城乃古新城則高都故

城宜在今洛陽嵩志似誤

秦新城

史記高祖紀漢王至雒陽新城三老董公遮說漢

王以義帝死故漢王聞之袒而大哭遂為義帝發喪

經注伊水又北逕新城東與吳澗水會水出縣之西山東

流南屈逕其縣故城西又東轉逕其縣南故蠻子國

按董公新城人遮說漢王則在今洛陽北入孟津縣已見前通池有義昌鎮亦謂董公說漢王處至新城見水經注者有二城一在伊水西一在吳澗水東吳澗水東為故城則秦新城也若漢以下之新城自別一城詳下

漢新城 前漢書地理志河南郡新城惠帝四年置

按前漢書及後漢書晉書宋書魏書皆有新城並漢舊縣乃水經注所謂伊水西之新城也

漢廣城 水經注伊水又與大戟水會出梁縣西水有二源

北水出廣城西南西南楊志塢北與南水合水源南出廣

城澤西流陸渾河南十二縣簿曰廣城澤在新城縣界

按後漢新城有廣城聚則城宜起于後漢前至後漢廢為聚耳今嵩有廣城聚

漢陸渾城 前漢書地理志崧農郡有陸渾縣

方輿

東漢建安二十四年陸渾民孫陸等起兵南附關

羽圍樊城也晉及後魏亦為陸渾縣又嘗置防

此蓋伊闕以南大山長谷多為蠻居故置督以

分北陸渾縣屬新城郡于南陸渾縣置伊陽郡此北陸渾

也

按陸渾東漢三國皆屬崧農首屬河南尹南宋屬河南郡東魏別置南陸渾而此為北陸其地在今嵩縣東北

四十里古城鄉

後魏太和城 水經注汝水東北流逕太和城西又東流逕

其城北左右深植鈞栢交蔭尹公度之所棲神處也

仙傳尹軌字公度博學五經尤明天文星氣河洛讖緯後

到太和山仙去

按嵩志太和城在縣南太和山下後魏時築西魏得其地置兵為防禦之所今縣南一百六十里孫店一名太

和川

東魏孔城 魏書地形志 新城郡天平中置治孔城 鄭樵

通志 孔城防今伊闕縣東南故城是 方輿紀要 孔城防

西魏大統四年權景宣與李延孫會攻孔城防拔之後周

天和四年盜殺周孔城防主以其地入齊蓋周齊相攻之

境也

東魏北荊州 地形志 北荊州武定二年置領郡三伊陽新

城汝北 杜佑通典 北荊州在陸渾東北故城是 隋書

地理志 北荊州後周改曰和州開皇初改曰伊州大業初

廢

按東魏北荊州所屬有新城郡郡領縣有北陸即北陸渾也與金門北陸實異縣或以陸渾東北故城即北陸

渾不知州自別治非寄治屬縣也

東魏南陸渾 地形志 伊陽郡領縣一南陸渾武定二年置

治伏流城後陷寄治州城 方輿紀要 五代志東魏置伊

陽郡領南陸渾縣隋初郡廢復曰陸渾縣唐因之五代時

省入伊陽縣今其地有伏流嶺亦曰伏流阪北去廢陸渾

縣二十餘里西魏大統初宇文泰以伊川豪李長壽為廣

州刺史長壽帥其徒拒東魏侯景攻破其壁殺之其子延

孫復集父兵拒東魏宇文泰仍以延孫為廣州刺史又以

長壽婿韋法保為東洛州刺史助延孫拒守法保與延孫

連兵置柵于伏流是也元和志東魏築伏流城以城北有

焦澗水伏流地下而名廣州時治襄城今屬許州或曰南
廣州治襄城此指魯陽也洛州時治商洛此蓋以洛陽南
境地僑置東洛州

按伏流之名已見水經注隋開皇初又改縣曰伏流大業初改陸渾唐及五代因之皆南陸渾也在今嵩治東二十里陸渾郵故址猶在

東魏南汝源縣 地形志汝北郡有南汝源

按今汝源盡入嵩縣縣南有汝源鎮在孫店西二十五里

東魏東亭縣 隋書地理志陸渾注有東魏東亭縣尋廢

按嵩志有東亭故城

伊闕縣 隋書地理志東魏置新城郡開皇初郡廢十八

年縣改名伊闕

按隋伊闕唐及五代宋因之熙寧五年廢在今縣治北九十里有古城砦牛僧儒嘗尉此

唐伊陽舊縣 唐書地理志河南府伊陽先天元年析陸渾

置有太白山

按伊陽故城在今治西七十里名舊縣鎮五代宋因之紹興九年升為順州皆治此非今汝州之伊陽縣也汝州之伊陽乃明成化間割嵩縣東四堡別置伊陽縣去舊縣尚有百餘里

金嵩州 方輿紀要金改順州為嵩州治伊陽縣元以縣省

入州屬南陽府明改嵩州為嵩縣改從今屬

按嵩志金改嵩州治今城元因之有金人王世元元學正曹秉彝學宮及東關廟碑可攷又志載燕王城慕容氏建潭頭古城唐時建出之傳聞無可徵信故不登

以上嵩縣

河南府志卷之五十九
古蹟志五
宮殿一 門闕附 洛陽
周王宮 周官宮人注六寢者路寢一小寢五 考工記周
人明堂度九尺之筵東西九筵南北七筵堂崇一筵五室
凡室二筵註或舉宗廟或舉王寢或舉明堂互言之以明
其同制
按周公營洛謂之王城其宗廟宮寢當如考工所記但
王宮既有定制亦無異名不似漢唐後宮殿無制隨所
作而繫以名耳
周宣榭 春秋宣十六年夏成周宣榭火

河南府志卷之五十九

古蹟志五

宮殿一 門闕附 洛陽

周王宮 周官宮人注六寢者路寢一小寢五 考工記周

人明堂度九尺之筵東西九筵南北七筵堂崇一筵五室

凡室二筵註或舉宗廟或舉王寢或舉明堂互言之以明

其同制

按周公營洛謂之王城其宗廟宮寢當如考工所記但
王宮既有定制亦無異名不似漢唐後宮殿無制隨所
作而繫以名耳

周宣榭 春秋宣十六年夏成周宣榭火

按屋厥前曰榭宣榭者宣王講武之榭也宣王復會諸侯於東都因田獵而選車徒詩車攻曰射夫既同蓋因會諸侯而講武也攷周邠敦銘曰王格于宣射考古圖云宣射即宣榭然曰王格則廟也豈後人即以祀宣與

周莊宮 昭二十三年傳六月甲午王子朝入于王城次左

卷秋七月戊申鄒羅納諸莊宮昭二十六年冬十一月癸

酉王入于成周甲戌盟於襄宮十二月癸未王入于莊宮

按傳稱納諸莊宮入于莊宮則莊宮似王別宮名也然以襄宮例之先儒既以襄宮為襄王廟則莊宮應亦為莊王廟蓋古者宮廟通曰宮非別宮名可知但敬王時去襄王六世去莊王九世莊廟已當祧不應復有莊廟或莊王之別宮後遂以莊宮名與

洛陽南宮 前漢書高帝紀五年夏五月帝置酒雒陽南

宮上曰通侯諸將毋敢隱朕皆言其情吾所以有天下者

何項氏所以失天下者何高起王陵對 云云 上曰公知其

一未知其二夫子房蕭何韓信三者皆人傑吾能用之此

吾所已取天下者也項羽有一范增而不能利用此所已為

吾禽也羣臣說服 張良傳上居雒陽南宮從復道望見

諸將往往數人偶語 史記作相與坐沙中語 後漢書光武紀建武

元年十月癸丑車駕入洛陽幸南宮却非殿十四年正月

起南宮前殿註蔡質漢典職儀云南宮至北宮中央作大

屋復道三行天子從中道從官夾左右十步一衛兩宮相

去七里 呂中大事記秦時已有南北宮更始自洛陽而

西馬奔觸北宮鐵柱門光武幸南宮却非殿則自高帝迄

于王莽洛陽南北宮武庫皆未嘗廢車千秋子為洛陽武庫令趙涉勸周亞夫

抵洛陽直入武庫蓋秦雖都關中猶放周東都之制建宮闕於洛

陽

按南宮之名見于後漢書者如帝紀中順帝即位尚書以下從輦到南宮馬后紀諸貴人徙居南宮五行志南宮諸殿闕列傳中顯宗圖二十八將於南宮雲臺顯宗為四姓小侯開學於南宮張酺數講於御前馮魴宿衛南宮賈逵入講南宮雲臺建初帝饗衛士于南宮鄭宏前後所陳補益王政皆著之南宮以為故事靈帝徙南宮闕錄故事下詔封楊賜臨晉侯凡事涉南宮者不可勝舉而南宮諸殿名見于後漢書者於光武紀曰南宮却非殿於五行志曰南宮宣室殿曰南宮嘉德殿曰南宮承善閣曰南宮嘉德署黃龍千秋萬歲殿曰南宮長秋和歡殿鈞盾掖庭於宦者傳曰南宮玉堂皆繫以南宮其不繫以南宮而在南宮者則有漢書注文選注洛陽宮闕名及隸釋會稽典錄諸書可參考而得并為錄出以附南宮之後

漢却非殿 光武紀却非殿注洛陽宮闕名有却非殿 玉

海洛陽故宮名曰洛陽有却非門

漢宣德殿 後漢書馬援傳建武四年冬躡使援奉書洛陽

援至引見於宣德殿 梁后紀和平元年春歸政於帝太

后寢疾遂篤乃御輦幸宣德殿

按東觀記援引入時上在宣德殿南廡下袒曠坐又考援嘗鑄銅馬式上之詔置宣德殿下故又名銅馬殿門為金馬門玉海以金馬門屬南宮則銅馬殿宜為南宮殿矣洛陽長安皆有金馬門洛陽金馬以光武時馬援所鑄銅馬名之也長安金馬以武帝時東門京所鑄銅馬名之也

漢陽明殿 會稽典錄嚴遵字子陵建武五年詔召遵設樂

陽明殿命宴會暮留宿其夜客星犯天子宿

按洛陽舊志在南宮

漢南宮前殿 光武紀起南宮前殿 張平子東京賦於南

則前殿靈臺 蘇驩安福李善注前殿路寢也

按平子賦則前殿別無殿名

雲臺殿 文選五臣注前殿靈臺作雲臺 玉海東京賦前

殿雲臺張銑注殿名

按雲臺為殿名則顯宗圖二十八將於雲臺者圖於殿中也非圖於臺上也

蘇驩殿 五行志南宮長秋和歡殿

按和歡即蘇驩

安福殿 黃香傳肅宗時召詣安福殿言政事

按文選李善注和歡安福二殿並在德陽殿之南據前注既以德陽為北宮殿名則二殿似亦在北宮然考五行志和歡繫以南宮則李注殊不分曉

漢崇德殿 安帝紀太后御崇德殿注洛陽南宮有崇德殿

蔡邕傳 光和元年召邕與光祿大夫楊賜諫議大夫馬日

碑議郎張華太史令單颺詣金商門引入崇德殿注洛陽

記曰南宮有崇德殿西有金商門

按東京賦既新崇德遂作德陽據洛陽記崇德在南宮西有金商門則賦所謂昭仁惠於崇賢抗義聲於金商者崇德東西門也德陽在北宮則賦所謂飛雲龍於春路屯神虎於秋方者德陽東西門也故宮殿簿曰北宮有雲龍門神虎門夫崇德在南宮德陽在北宮二殿宜南北相直而李善注文選乃曰崇德在東德陽在西相去五十步恐其未深考耳

漢九龍殿 隸釋國三老袁良碑云拜梁相帝御九龍殿引

對 東京賦九龍注九龍本周時殿名也門上三銅柱柱

有三龍相糾繞故曰九龍

按注謂九龍為周時殿名而玉海謂殿之名始於秦時周時何得有殿或者呂不韋封洛陽依秦制為之後人遂誤傳為周殿歟

漢嘉德殿 孝仁后紀居南宮嘉德殿宮稱永樂 虞詡傳

鄧太后以詔有將帥畧遣武都太守引見嘉德殿 楊賜

傳光和元年有虹蜺晝見於嘉德殿前帝引賜及蔡邕等

入金商門間以災異注洛陽記云殿在九龍門內 東京

賦九龍之內實曰嘉德

按孝仁后居嘉德殿稱永樂宮名殿以宮者尊后也非別有永樂宮也若九龍自別有九龍殿與嘉德殿同在九龍門內非嘉德殿即九龍殿也

東京賦注自明不得混而為一

漢宣室殿 後漢書五行志永元八年十二月丁巳南宮宣

室殿火是時和帝幸北宮竇太后在南宮

漢黃龍殿 辨在下

漢千秋殿 辨在下

漢萬歲殿 五行志延熹八年二月己酉南宮嘉德署黃龍

千秋萬歲殿皆火 延熹八年閏九月南宮嘉德署黃龍見千秋萬歲

按桓帝紀延熹八年春南宮嘉德署黃龍見千秋萬歲殿火據紀黃龍見於嘉德署非別有黃龍殿也范氏後漢書據史采入帝紀而五行志紀災則於黃龍下遺一見字於千秋萬歲殿下多一皆字又似黃龍為殿各案

唐藝文類聚引洛陽故宮名有黃龍殿玉海亦有黃龍殿皆五行志誤之也且紀曰千秋萬歲殿似一殿名玉海別為二殿亦范史志中一皆字誤之也

漢長秋殿 五行志延熹八年閏月南宮長秋和歡殿後鉤

盾掖庭朔平署各火

按五行志有朔平署又有承善闔署者殿署也闔者殿闔也門謂之闔宮謂之署有朔平署是有朔平殿也有承善闔是有承善殿也皆在南宮

漢玉堂殿 靈帝紀中平三年春二月復修玉堂殿鑄銅人

四黃鐘四及天祿蝦蟇 宦者傳靈帝使鉤盾令宋典繕

修南宮玉堂又鑄四鐘皆受二千斛縣於玉堂及雲臺殿

前

按玉海又有玉堂前後殿

漢敬法殿 東觀漢記明德馬皇后常有不安時在敬法殿

東廂帝令太夫人及兄弟得入見

漢清涼殿

漢鳳凰殿

漢竹殿 唐歐陽詢藝文類聚洛陽故諸宮名曰洛陽南宮

有却非殿銅馬殿敬法殿清涼殿鳳凰殿嘉德殿黃龍殿

竹殿

漢玉堂後殿 靈帝紀光和元年秋七月壬子青虹見御坐

玉堂後殿庭中 注洛陽宮殿名南宮有玉堂前後殿據楊

賜傳云墮嘉德殿前

按據後漢書記青虹之異一云玉堂後殿庭中一云嘉德殿前非異地也用以知南宮玉堂前後殿在嘉德殿前矣

漢樂成殿

靈帝紀南宮火注續漢志云時燒靈臺殿樂成

殿延及北闕度道西燒嘉德和歡殿

按續漢志南宮又有樂成殿靈臺即雲臺已見前於嘉德和歡曰北闕道西知二殿在南宮東北隅也又按五行志中平二年南宮雲臺災庚戌樂成門災注南宮中門據志注與靈帝紀注不同一以為成一以為城一以樂成為殿一以樂城為門二者未知孰是又五行志雲臺災自起懷題數百同時竝然蓋就縣華靈其類東墮延及白虎城與門尚書符節蘭臺夫雲臺者正堂前并無雲臺以為周家所造者漢因周基耳周之延王無及云物以望氛祲漢之雲臺則架木為殿非

復臺制不可不辨

漢楊安殿

董卓傳建安元年春諸將爭權韓暹遂攻董卓

承奔張楊楊乃使承先繕修洛宮七月帝還至洛陽幸楊

安殿張楊以為己功故因以楊名殿

按後漢注以為舊時宮殿悉壞倉卒之際拾撫故瓦材木工匠無法度之制所作並無足觀據洛陽舊志殿在南宮當宮殿悉壞之時而殿始立不知因何殿舊址而為之也

漢承福殿

順帝紀永和元年冬十月丁亥承福殿火帝避

御雲臺

按雲臺為南宮殿帝倉卒避火猶未出南宮則承福殿亦宜在南宮中也

漢建始殿

玉海洛陽南宮有建始殿

漢仁壽殿

玉海洛陽南宮仁壽闈在焉

按藝文類聚引洛陽宮殿簿曰明光徽音式乾暉章含章建始仁壽宣光嘉福百福芙蓉九華流圃華光崇光並殿名考洛陽舊志以十五殿皆漢殿名歷代因之故殿名或見于魏志而不盡見于漢書其在漢南宮者據玉海惟建始仁壽耳而洛陽舊志又以仁壽殿與式乾含章芙蓉九華等並入北宮與玉海南宮仁壽闈不合並存之可也

漢洛陽南宮門

張平子東京賦注端門南方正門洛陽宮

舍記曰洛陽有端門應門中門也崇賢東門名也金商西

門名也

却非門

見前

九龍門

見前

白虎威興門

見前

按玉海洛陽南宮有司馬門掖門承明門金馬門鴻都

門青瑣門崇德殿之正門也

東京賦謖門曲榭

按順帝紀注漢官儀云崇賢門內德陽殿德陽殿乃北宮殿名李善注文選以德陽殿東門為雲龍門而賦中自別有崇賢門洛陽舊志以崇賢屬南宮與文選注同與漢官儀異又按文選李善注謖門水室門也余蕭客文選音義謖移也字訓別沈括筆談別門故以對曲榭無定處也

漢洛陽南宮闕

水經注周官太宰以正月懸治法於象魏

廣雅曰闕謂之象魏風俗通曰魯昭公設兩觀於門是謂之闕從門厥聲爾雅曰觀謂之闕說文曰闕門觀也漢官典職曰偃師去洛四十五里望朱雀闕其上鬱然與天連是明峻極矣洛陽故宮有朱雀闕白虎闕蒼龍闕北闕南宮闕也玉海漢洛陽南宮有朱雀蒼龍白虎元武闕

按水經注玉海南宮有四闕前引靈帝紀北闕亦在南宮是南北宮各有闕也而洛陽舊志南宮無闕北宮有

關殊
失考

右漢洛陽南宮殿闕

按南宮諸殿舊洛陽志以崇德殿為正殿今據文選注前殿路寢則南前殿乃正殿也但光武紀南宮前殿起于建武十四年在建武元年幸却非殿而定都是未起前殿特以却非殿為正殿前殿者却非之前殿也殿各有門故別有却非門至崇德殿據玉海引河南志曰崇德殿明帝永平中置今殿基當在正殿之西曷以知在西也邕等詣金商門引入崇德殿洛陽記南宮崇德殿西有金商門金商門乃南宮之西門於金商門入崇德殿是以知崇德之在正殿西也若宣德殿祖情見馬援陽明殿宴子陵留宿則皆便殿也嘉德與九龍同在九龍門內而嘉德在北闕道西則九龍當在正殿東也玉堂前後殿在嘉德殿前和歡殿在嘉德殿旁則平子賦所謂靈臺安福與和歡以類相從者知皆在正殿北若東也又司署太倉武庫鉤盾掖庭何閣蘭臺東觀據後漢書及玉海

並在南宮中

漢洛陽北宮

後漢書明帝紀永平三年起北宮及諸官府

八年十月北宮成

鍾離意傳永平三年夏旱而大起北

宮意詣闕免冠上疏曰伏見陛下以天時小旱憂念元元降避正殿躬自克責而比日密雲遂無大潤豈政有未得應天心者耶昔成湯遭旱以六事自責竊見北宮大作人失農時此所謂宮室榮也自古非苦宮室小狹但患人不安寧宜且罷止以應天心帝敕大匠止作諸宮減省不急遂應時注雨後德陽殿成百官大會帝思意言謂公卿曰鍾離尚書在此殿不立逸民傳井丹性清高未嘗修刺侯人建武末沛王輔等五王居北宮皆好賓客更遣請丹

不能致

漢德陽殿

禮儀志注蔡質漢儀曰正月旦天子幸德陽殿

臨軒公卿將大夫百官各陪朝賀蠻貊胡羌朝貢畢見屬郡計吏皆陛祖庭燎宗室諸劉雜會萬人以上立西面位定公納薦大官賜食酒西入東出既定上壽計吏中庭北面立大官尚食賜羣臣酒食貢事御史四人執法殿下虎賁羽林弧弓撮矢陛戟左右戎頭偏脛啟前向後左右中郎將住東西羽林虎賁將住東北五官將住中央悉坐就賜作九賓徹樂鐘磬並作樂畢作魚龍曼延小黃門吹三通謁者引公卿羣臣以次拜微行出罷卑官在前尊官在

後德陽殿周旋容萬人陛高二丈皆文石作壇激洛水於殿下畫屋朱梁玉階金柱刻縷作宮掖之好厠以青翡翠一柱三帶韜以赤緹天子正旦節會朝百官於此白到偃師去宮四十三里望朱雀五闕德陽其上鬱律與天連雒陽宮閣傳云德陽宮殿南北行七丈東西行三十七丈四尺李尤德陽殿銘大漢體天承以德陽崇高宏麗包受萬方內總朝貢外供遐荒

按德陽殿北宮正殿也月朔歲朔天子臨軒受朝賀大臣上殿稱萬歲百官受賜宴饗辨朝儀其隨時議政則又有司徒府中大會殿周官注所謂外朝之存者也詳在下

漢百官朝會殿

百官志注蔡質漢儀曰司徒府與蒼龍闕

對厭於尊者不敢號府應劭曰不然丞相舊位在長安時
府有四出門隨時聽事明帝本欲依之迫於太尉司空但
為東西門耳國每有大議天子車駕親幸其殿殿西王侯
以下更衣併存每歲州郡聽採長吏臧否民所疾苦還條
奏之是為之舉謠言者也頃者舉謠言者掾屬令史都會
殿上三者大言某州郡行狀云何善者同聲稱之不善者
各爾銜枚周禮有外朝于賢注曰禮司徒府中有百官朝
會殿天子與丞相決大事是外朝之存者 律歷志熹平
四年馮光陳晃言歷元不正乙卯詔書下三府與儒林明
道者詳議以羣臣會司徒府議

宣明殿 桓郁傳郁遷侍中帝自制五家要說章句令郁

校定於宣明殿 注華嶠書曰帝自制五行章句此言五家
即謂五行之家也宣明殿在德陽殿後

按司徒府百官朝會殿外朝也則德陽正殿當為治朝
也德陽殿後宣明殿當為內朝也外朝以決大議治朝
以受朝賀內朝以持引見羣臣故桓郁引見宣明殿又
有廣陵王荆引見宣明殿樊儵引見宣明殿皆見後漢書

漢章臺殿 馬防傳子鉅為常從小侯肅宗以鉅當冠特拜
為黃門侍郎肅宗親御章臺下殿陳闕俎自臨冠之 曾

恭傳永元九年徵拜議郎八月飲耐齋會章臺詔使小黃
門特引恭前其夜拜侍中敕使陪乘勞問甚渥

漢含德殿 東京賦內則含德章臺天祿宣明溫飭迎春壽

安永寧注八殿皆以休令為名美時君之德在應門之內也

按東京賦所謂內者北宮為內也注應門之內者北宮應門之內也如是則八殿俱在北宮矣

漢天祿殿

漢溫飭殿

漢迎春殿

漢永寧殿

以上四殿見含德殿下

漢壽安殿

梁后紀陽嘉元年春有司奏立長秋宮乃於壽

安殿立貴妃為皇后注壽安是德陽宮內殿名

光殿

賜傳建寧初靈帝當受學詔太傅三公選通

尚書桓君章旬宿有重名者三公舉賜乃侍講於華光殿

中注洛陽宮殿名曰華光殿在崇光殿北 劉寬傳靈帝

初召拜大中大夫侍講華光殿遷侍中賜衣一襲注洛陽

宮殿簿云殿在華林園內

漢崇光殿 藝文類聚華光崇光並殿名

按文選注洛陽圖經曰華林園在城內東北隅魏明帝起名芳林園齊王芳改為華林夫華林在東北隅是地接北宮也華光殿在華林園內是華光為北宮殿也華光在崇光殿北是崇光亦為北宮殿也故一殿宜入北宮

漢章德殿 竇后傳建初二年后與女弟俱曰選例入見長

樂宮進止有序風容甚盛肅宗先聞后有才色數目訊諸

姬傅及見雅以為美馬太后亦異焉因入掖庭見於北宮

章德殿

清河王慶傳帝移幸北宮章德殿

漢溫德殿

靈帝紀光和元年六月丁丑有黑氣墮所御溫

德殿庭中

注作溫明

按洛陽舊志在北宮

漢宣平殿

張純傳子奮嗣爵歸國永平十年儋耳降附奮

來朝上壽引見宣平殿應對合旨顯宗異其才曰為侍祠侯

漢顯親殿

周舉傳順帝永和元年災異數見省內惡之詔

召公卿中二千石尚書詣顯親殿言事帝從舉議又召舉於顯親殿問以災眚

按方輿紀要北宮禁門亦曰省門據周舉傳省內詔公卿詣顯親殿言事則顯親殿當在北宮矣

漢永安宮

百宮志永安丞一人三百石本注曰宦者永安

北宮東北別小宮名有園觀

玉海洛陽宮殿名曰永安

宮周廻六百九十八丈故基在洛陽故城中

漢濯龍宮

馬后紀帝幸濯龍中諸才人下邳王以下皆在

側請呼皇后帝笑曰是家志不好樂雖來無歡是呂遊娛之事希嘗從焉注續漢志曰濯龍園名近北宮東京賦

注濯龍池名

後漢書注薛綜注濯龍殿名良曰廐名

李尤賦德陽之北斯曰濯龍

按續漢志以濯龍為近北宮似在北宮外然李尤賦以為在德陽之北則猶在北宮內也但一濯龍也或以為

宮或以為殿或以為池或以為園或以為廡何以為廡何也蓋濯龍宮中必有殿有池有園有廡皆得以濯龍名耳

漢承光宮 種嵩傳順帝擢嵩見太子於承光宮嵩手劍當

車云云

按太子宮曰青宮當在北宮王宮之東承光宮者太子之東宮也又按上三宮皆北宮中宮名故附北宮諸殿後

漢顯揚殿 雲氣殿 楊龍驤洛陽記顯揚殿北有雲氣殿

按玉海歷代殿名漢有雲氣殿後魏有顯揚殿今顯揚又以事入後魏

漢洛陽北宮門 馬融傳注續漢書曰融對策於北宮端門

五行志有北宮盛饌門閤東掖庭 百官志衛尉卿一

八中二千石本注曰掌宮門衛士宮中徼循事丞一人比

千石公車司馬令一人六百石本注曰掌宮南闕門凡吏

民上章四方貢獻及徵詣公車者丞尉各一人本注曰丞

選曉諱掌知非法尉主闕門兵禁戒非常宮掖門每門司

馬一人比千石本注曰南宮南屯司馬主平城門宮門蒼

龍司馬主東門元武司馬主元武門北屯司馬主北門北

宮朱爵司馬主南掖門東明司馬主東門朔平司馬主北

門凡七門凡居宮中者皆有口籍於門之所屬宮名兩字

為鐵印文符案省符乃內之若外人以事當入本宮長史

為對檠傳其有官位出入令御者言其官 玉海漢建禮

門 方輿紀要北宮禁門亦曰省門又名章臺門北宮北

門曰朔平門省門內有崇元諸門門內即德陽殿又有承明門

按南北宮掖門俱屬衛尉故並見於此南屯司馬主平城門平城門者城南門即南宮門也故別無朱爵司馬而北宮則有司馬專掌之至南北宮俱無白虎司馬者豈為西方秋殺不專設官而以他官兼之與東京賦曰飛雲龍於春路屯神虎於秋方而東都賦但言春王三朝供帳置於雲龍之庭言雲龍不言神虎亦此意也又按建禮門即省門也文選注十州記曰崇禮闈即尚書上省門崇禮東建禮門即尚書下省門三門名禮故曰禮闈據禮家所謂闈門者正寢旁小門也則方輿紀要所謂省門者乃掖門非端門也不可辨又百官志所謂公車者門名也

漢洛陽北宮闕 百官志注古今注曰永平二年十一月初作北宮朱雀南司馬門

按北宮朱雀北宮南闕也永平二年以初作則前此北宮猶未備朱雀闕也

右漢洛陽北宮殿闕

按洛陽北宮之義與周官王之北宮不同周官王之北宮在王之路寢後乃王后所居也漢洛陽北宮對南宮生稱故天子三朝北宮皆有之或以百官朝會殿於古為外朝外朝在雉門外雉門有兩觀漢之北宮朱雀闕即古之兩觀遂疑百官朝會殿當在北宮朱雀闕外不知漢儀謂司徒府與蒼龍闕對百官朝會殿即在司徒府中東對蒼龍必南對朱雀也漢三朝之制雖倣於古而四闕之立實生於漢古今不必盡同但朝會德陽宣明三殿外皆為便殿故或以冠小侯或以立貴人或以儒臣侍講或以女色選入皆天子不時臨御與古路寢後五小寢同

漢三宮 東京賦乃營三宮布教殞常複道重屋八達九房

規天矩地授時順鄉造舟清池惟水泱泱左制辟雍右立

靈臺因進距衰表賢簡能馮相觀祓祈禳禳災

按三宮謂明堂辟雍靈臺也明堂之制即賦所謂復道重屋八達九房規天矩地授時順鄉造舟清池惟水亦決也明堂之左曰辟雍賦所謂因進距衰表賢簡能也明堂之右曰靈臺賦所謂馮相觀祓祈禳禳災也據漢世禮家言明堂在王國之南則漢所營三宮當在南門外而文選注即以德陽殿為明堂言德陽殿東有辟雍西有靈臺是又祭禮家明堂即路寢之說而言之但東京賦於西北宮諸殿外乃曰營三宮似賦與注各為一義故別列三宮於南北宮外併存注義而論其異同焉

漢胡桃宮

南匈奴傳漢安二年中郎將持節護送單于歸

南庭詔太常大鴻臚與諸國侍子於廣陽城門外祖會饗

易作樂角抵百戲順帝幸胡桃宮臨觀之

按廣陽門洛陽城西面南頭門則胡桃宮當在城外西南也

魏洛陽宮

魏志文帝紀營洛陽宮注臣松之曰時帝居北

宮以建始殿朝羣臣門曰承明陳思王植詩曰謁帝承明

廬是也至明帝始於漢南宮崇德殿處起太極昭陽諸殿

明帝紀青龍三年三月大治洛陽宮起昭陽太極殿築

總章觀注高十餘丈建翔鳳於其上玉海洛陽宮殿簿有

魏太極九龍芙蓉九華承光諸殿

按建始殿漢在南宮至魏乃在北宮則太極諸殿所謂因漢南宮崇德殿處者雖因其舊基而南北宮固未嘗別為二也何以知不別也蓋漢時洛水貫城在南北宮之間魏晉以後洛復南徙南北宮地相接故不別也何以知魏晉後洛南徙也漢高祖見諸將坐沙中語乃復道旁洛水沙上至東漢猶激洛水于德陽殿下斯時洛猶未徙魏乃引穀水激于殿下晉及後魏因之道元記穀水入都城南分一支遶城西而南而東在十二城門

外若洛未南徙何以魏不激洛水而引穀水後魏時穀水何得飛度洛水上遶南城門外是以知魏晉後洛南徙也洛既南徙則南北宮殿雖有故基可指然既合二為一則南北宮可以不別而類記諸殿於魏宮之後

魏太極殿

王海魏明帝上法太極於洛陽南宮起太極殿

初學記歷代殿名或泐或革惟魏之太極自晉以降正殿皆名之

魏建始殿

張道傳黃初二年遼朝洛陽宮文帝引會建始

殿親問破吳意狀帝歎息顧左右曰此亦古之召虎也

魏九龍殿

明帝紀青龍三年洛陽崇華殿災命有司復崇

華改名九龍殿

魏志注引穀水過九龍前為玉井綺欄

蟾蜍含受神龍吐出使博士馬均作司南車水轉百戲

魏芙蓉殿

三少帝紀注延小優郭懷袁信等於建始芙蓉

殿前

魏九華殿

方輿紀要華林園天淵池內有魏文帝九華殿

魏承光殿

文帝紀注黃權等詣行在所帝置酒設樂引見

於承光殿

魏昭陽殿

高堂隆傳景初元年建昭陽殿於太極之北鑄

作黃龍鳳皇奇偉之獸飾金墉陵雲臺陵霄闕百役繁興

者萬數高堂降上疏切諫

按洛陽志於魏列景陽殿引魏志為証今攷高堂隆傳鑿太山之石英采穀城之文石起景陽山於芳林之園洛陽志作起景陽殿于芳林之園易山字為殿字何其誣也

又按魏志后妃傳文帝踐祚尊后曰皇太后稱永壽宮
明帝即位尊后為皇太后稱永安宮齊王即位尊后為
皇太后稱永寧宮三宮與漢家稱
永樂宮同非別營宮也故不登

魏洛陽宮諸門闕

水經注魏改雉門為閭闔門昔在漢世

洛陽宮殿門題多是大篆言是蔡邕諸子魏南宮旁題多

是梁鵠筆南宮既建明帝令韋誕以古篆書之 文選曹

子建詩謁帝承明廬注洛陽記曰承明門後宮出入之門

常怪謁帝承明廬問張公云魏明帝作建始殿朝會皆由

承明門 高堂隆傳陵霄闕始建有鵲巢其上帝以問隆

魏畧青龍二年築閭闔諸門闕外畧不慮

晉洛陽宮

方輿紀要曹丕篡魏營洛陽宮晉武都洛大抵

因之永嘉之季劉曜陷洛復成灰燼

晉太極殿

晉書武帝紀武帝受禪即洛陽宮幸太極前殿

晉崇正殿

文選潘安仁詩曜藻崇正注太子之宮也

晉洛陽宮闕

玉海晉宮闕名洛陽宮有崇陽闕延明通明

修雲通福徽音承休元明元暉崇禮白藏闕

後魏洛陽宮

魏書高祖紀太和十七年九月庚午幸洛陽

周巡故宮基址帝顧謂侍臣曰晉德不修早傾宗祀荒毀

至此用傷朕懷遂詠黍離之詩為之流涕壬申觀洛橋幸

太學觀石經定遷都之計十八年春正月乙亥幸洛陽西

宮壬寅車駕北巡壬申至平城宮冬十月戊申親告太廟

奉遷神主辛亥車駕發平城宮十一月己丑至洛陽

後魏太極前殿 世宗紀景明三年十二月壬寅饗羣臣于

太極前殿賜布帛有差以初成也

後魏式乾殿 世宗紀正始三年十一月帝為京兆王愉清

河王懌廣平王懷汝南王悅講孝經於式乾殿

後魏宣光殿 肅宗紀帝朝皇太后於宣光殿大赦天下

後魏顯陽殿 肅宗紀熙平二年八月宴太祖以來宗室年

十五以上於顯陽殿申家人之禮

後魏觀德殿 任城王澄傳車駕還洛引見王公侍臣於清

徽堂次之觀德殿高祖曰射以觀德故遂命之

河南府志卷之六十

古蹟志六

宮殿二

隋洛陽宮

大業雜記宮城東西五里二百步南北七里正

門曰則天門南去端門五百步則天門兩重觀觀上曰紫

微觀左右連闕闕高二十尺

隋乾陽殿

大業雜記則天門內永泰門東西坐宿衛兵門

內有乾陽門並重樓東西亦軒廊周而門內有乾陽殿殿

基高九尺從地至鴟尾高一百七十尺又十三間二十九

架三陸軒文提鏤檻櫺百重棗拱千構雲楣綉柱華椽

碧檔窮軒薨之壯麗其柱大二十四圍倚井垂蓮仰之者眩曜南軒垂以珠絲網絡十不垂地七尺以防飛鳥四面周以軒廊坐宿衛兵殿庭左右各有大井井面濶二十尺庭東南西南各有重樓一懸鐘一懸鼓刻漏即在樓下隨刻漏則鳴鐘鼓

隋大業殿 大業雜記乾陽大殿北有大業門門內大業殿規模小於乾陽殿而雕綺過之

隋文成殿 大業雜記乾陽殿東有東上閣閣東又南行有東華門門東道北有文成門內有文成殿周以軒廊

隋武安殿 大業雜記乾陽殿西有西上閣入內宮閣戶又

行有西華門出門西道 疑脫一北字 有武安門內有武安殿周以軒廊

按大業文成武安三殿據記御坐見朝臣則宿衛隨入于其內宮人殿庭並種枇杷海棠石榴青梧桐及諸名藥奇卉東有大井二面濶十餘尺深百餘尺其三殿之內內宮諸殿甚多不能盡知

隋東宮 大業雜記入章善門橫街東百二十步有重潤門東有東宮

隋元靖殿 大業雜記入明福門北行三十步有元靖門內有元靖殿周以軒廊即宮內別供經像之處

隋修文殿 大業雜記出元靖門橫街東行四十步有修文殿

隋儀鸞殿

大業雜記寶城內有儀鸞殿殿南有烏桄林栗
林有葡萄架四行行長百餘步架南射堂對閭闔門
通鑑大業十一年有孔雀二自西苑飛集朝堂校尉高德儒
等奏以為鸞於是百官稱賀詔於其地造儀鸞殿

隋觀象殿

隋書天文志宋元嘉中所造儀象器開皇九年
平陳後竝入長安大業初移于東都觀象殿

隋觀文殿

六典注隋於東都置觀文殿東西廂貯書

隋含涼殿

王世充傳武德二年四月世充矯侗策禪位
侗於含涼殿

按上諸殿皆在
洛陽紫微宮內

隋天經宮

詳在下

隋仙都宮

大業雜記建國門西二里有白虎門西二里至
苑城傍城行三里有天經宮南二里有仙都宮並置先帝
廟堂大業四年自京師還東都造

隋亭子宮

大業雜記上春門東十二里有亭子宮宮南臨
漕渠東臨積潤池

隋景華宮

大業雜記建國門西南十二里有景華宮宮內
有含景殿及射堂樓觀

隋含景殿

見上

隋甘泉宮

大業雜記甘泉宮一名芳潤宮周十餘里宮北

河南府志

卷之六十 古蹟志

三

宮殿二

通西苑其內多山阜崇峰曲澗秀麗標奇其中有闐風亭
及棲霞觀行雨臺清暑殿殿南有通仙飛橋百尺澗青蓮
峯峯上有翠微亭遊賞之美於斯為最大業元年春遷都
未成敕內史舍人封德彝於此置宮

隋清暑殿

見上

隋青城宮

〔方輿紀要〕西苑內青城宮隋齋宮也武德三年
世民攻洛陽軍于北邙世充陳于青城宮世民亦置陳當
之武德四年世民移軍青城宮世充自方諸門出憑故馬
坊垣塹臨穀水以拒唐兵為世民所殿方諸門都城西出
禁苑之門也

隋明德宮

〔方輿紀要〕明德宮大業初建于禁苑中

隋總仙宮

〔大業雜記〕西苑內造山為海周十餘里中有方
丈蓬萊瀛洲諸山相去各三百步山出水百餘尺上有總
仙宮風亭月觀皆以機成或起或滅若有神變

隋曲水殿

〔大業雜記〕西苑曲水池有曲水殿上已禊飲之

所

按上自青城宮下
皆西苑內宮殿

唐洛陽宮

〔唐書地理志〕洛陽宮城名曰紫微城

〔玉海〕洛

陽宮太宗幸者六高宗幸者十四武后號太初宮太宗為
秦王時建德世充平置酒大會洛陽宮論郭孝恪之功又

召張儉見洛陽宮論遼西山川險易

會要貞觀三年太

宗將修洛陽宮戴胄諫上嘉之四年又修張元素諫即停

之六典皇宮南面三門中應天左興教右光政應天內

曰乾元門興教內曰會昌章善光政內曰廣運明福乾元

左曰萬春右曰千秋其內曰乾元殿殿之左曰春暉門右

曰秋景門北曰燭龍門明福之東曰武成門其內曰武成

殿明福之西曰崇賢門其內曰集賢殿武成之北曰長壽

殿集賢殿之北曰仙居殿東曰億歲殿又東曰同明殿西

北出曰洛城西門其內曰德昌殿北曰儀鸞殿南出曰延

慶門又南曰韶暉門西南曰洛城南門其內曰洛城殿又

北曰飲羽殿

方輿紀要唐武德四年平洛陽隋宮遂廢

貞觀中復治之

徽以後營繕益密其別殿臺觀在宮內

者凡二十五所

唐乾元殿

會要武德四年使行臺僕射屈突通焚乾元殿

以其太奢顯慶元年敕司農少卿田仁汪修乾元殿麟德

二年殿成垂拱四年以殿為明堂開元二十七年於明堂

造乾元殿毀上層改下層為殿

褚無量傳開元中詔無

量等於乾元殿整比四部書

蘇定方傳降都曼俘獻於

乾陽殿

玉海隋曰乾陽唐曰乾元明堂後改含元

唐武成殿

員半千傳高宗御武成殿問兵家有三陣何謂

邪衆未能對半千進曰臣聞古者星宿孤虛天陣也山川
向背地陣也偏伍彌縫人陣也臣謂不然夫師以義出沛
若時雨得天之時爲天陣足食約費且耕且戰得地之利
爲地陣舉三軍士如子弟從父兄得人之和爲人陣舍是
則何以戰帝曰善

唐集賢殿

通鑑開元十三年上與中書門下及禮官學士
宴於集仙殿上曰仙者憑虛之論朕所不取賢者濟理之
具今與卿曹合宴宜更名曰集賢

唐長壽殿

見上洛陽宮

唐仙居殿

見上洛陽宮

唐億歲殿

唐書崔神慶傳武后時待制億歲殿

玉海元

宗開元十五年閏九月億歲殿生芝草在東都

唐同明殿

薛訥傳突厥擾河北武后詔訥經略對同明殿

齊澣傳

太子還武后召澣宴同明殿曰朕母子如初卿

有力焉

唐德昌殿

見上洛陽宮

唐儀鸞殿

太宗實錄正觀十一年三月三日引五品已上

大射於儀鳳殿十八年十一月宴父老於儀鸞殿

唐洛城殿

方輿紀要洛城南門內曰洛城殿龍朔初與羣

臣外夷宴于洛城門武后載初二年策貢士于洛城殿或

以此為夾城內別宮也

唐飲羽殿

見上洛陽宮

唐金華殿

陳子昂傳武后奇其才召見金華殿

玉海金

華殿在東都

唐含樞殿

狄仁傑傳武后時李楷固駱務整討契丹克之

獻俘含樞殿后舉酒屬仁傑賞其知人

玉海在東都

唐貞觀殿

玉海正觀十一年十一月宴五品已上及蕃夷

於正觀殿十八年日南至皇太子王公已下展賀正觀殿

唐端辰殿

會要神龍元年正月中宗即位於通天宮端辰

殿 玉海在東都

按則天紀萬歲登封三年在神都復作明堂改曰通天宮神功元年置九鼎于通天宮明堂即乾元殿也通天宮即紫微宮也故不別列通天宮而以端辰殿與乾元以下諸殿俱繫于洛陽紫微宮後

又按武后垂拱四年改洛陽明堂為萬象神宮永昌元年饗于萬象神宮亦通天宮之別名也

唐飛山宮

會要貞觀十一年正月十四日新作飛山宮

魏徵傳帝作飛山宮徵上疏諫於是廢明德元圃院賜遭

水者

唐明德宮

太宗紀貞觀十一年三月如洛陽宮六月幸明

德宮七月大雨水穀洛溢詔百官言事廢明德宮之元圃

院賜遭水家

玉海高宗顯慶二年五月幸明德宮避暑

唐八關宮

會要顯慶五年四月八日於東都苑內造八關

京宮五月二十日改爲合璧宮

唐宿羽宮

高山宮

翠微宮

韋宏機傳高宗言兩京我

東西宅然隋宮室日什將更作奈財用何宏機言臣任司

農十年省常費三十萬緡以治宮室可不勞而成帝大悅

詔兼將作少府二官督營繕初造宿羽高山等宮 方輿

紀要調露初于隋苑中作宿羽高山宮尋又作翠微宮凡

離宮亭館共一十四所

唐上陽宮

地理志上陽宮在東都禁苑之東東接皇城之

西南隅上元中置高宗之季常居以聽政 六典上陽宮

南臨洛水西拒穀水東面二門南曰提象門北曰星躔門

提象門內曰觀風門南曰浴日樓北曰七寶閣其內曰觀

風殿北曰化成院西南曰甘露殿殿東雙曜亭又西曰麟

趾殿東曰神和亭西曰洞元堂觀風之西曰本枝院又西

曰麗春殿殿東曰含蓮亭西曰芙蓉亭又西曰宜男亭北

曰芬芳亭其內曰芬芳殿宮之南面曰僊洛門又西曰通

仙門其內曰甘湯院次北東上曰玉京門門內北曰金闕

門南曰太初門玉京之西曰客省院蔭殿翰林院宮西曰

含露門玉京西北出曰仙桃門又西曰壽昌門門北出曰

元武門門內之東飛龍廡

唐觀風殿

玉海武后徙上陽宮帝率百官詣觀風殿問起

居方輿紀要上陽門殿皆東向正殿曰觀風

唐甘露殿 麟趾殿 麗春殿 芬芳殿 蔭殿

並見上陽宮

唐西上陽宮 [兩京記]上陽宮西有西上陽宮 [方輿紀要]

上陽西隔穀水為西上陽虹梁跨穀行幸往來皆高宗龍朔後所置

按隋志河南桃林有上陽宮在今閩鄉或以為即唐西上陽不知唐之西上陽自在洛陽閩鄉乃隋上陽非唐之西上陽也

唐迎仙宮 [李濂通志]唐建即張柬之斬張易之昌宗處

唐長生殿 [張廷珪傳]武后召見長生殿 [玉海注]在東都

[通鑑]張柬之遣詣東宮迎太子斬關而入斬易之昌宗於

庶下進至太后所寢長生殿

唐避暑殿 [李濂通志]在府城西北上店唐武后建

唐太微宮 [玉海天寶]二年加號混元皇帝為大聖祖改西

京混元宮曰太清宮東京曰太微宮

五代梁文明殿 [梁紀]乾化元年九月朔御文明殿入閣

按梁紀注御殿而云入閣錄其本語以見禮失事在李琪列傳傳載明宗言唐故事天子日御見羣臣曰常參朔望薦食諸陵寢有思慕之心不能臨前殿則御便殿也謂之閣其不御前殿而御便殿也乃自正衙喚仗由閣門而入百官侍朝于衙者因隨以入見故謂之入閣然衙朝也其禮尊閣宴見也其事殺自乾符已後因亂禮缺天子不能日見羣臣而見朔望故正衙常日廢仗而朔望入閣有仗其後習見遂以入閣為重至出御前殿猶謂之入閣其後亦廢至是而復然有司不能講正

古蹟志

宮殿二

其事凡羣臣五日一入見中興殿便殿也此入閣之遺制而謂之起居朔望一出御文明殿前殿也反謂之入閣琪皆不能正也

五代唐長壽宮 五代史唐家人傳莊宗滅梁入洛使人迎

太后歸洛居長壽宮

五代唐興聖宮 明宗紀天成元年入洛陽監國朝羣臣于

興聖宮

五代唐冷泉宮 明宗紀天成元年以象笏三十二賜百官

之無笏者闕稼於冷泉宮

五代唐至德宮 明宗紀天成元年九月幸至德宮

五代唐中興殿 伶官傳莊宗朝羣臣於中興殿

五代唐絳霄殿 伶官傳郭從謙攻興教門莊宗聞亂率衛

士擊亂軍出門亂兵從樓上射帝帝傷重踏于絳霄殿

五代唐臨芳殿 清異錄莊宗建殿前有牡丹千餘本

宋洛陽宮 玉海開寶八年十月將議巡幸遣王仁珪李仁

祚焦繼勛同修洛陽宮室明年三月帝至洛觀其壯麗繼

勛等並進秩 會要西京大內據京城之西北宮城周迴

九里三百步南面三門南曰五鳳樓東曰興教西曰光政

東一門曰蒼龍西門曰金虎北門曰拱宸正殿曰太極殿

殿前有左右龍尾道曰樓月樓次天興殿後有殿閣太極

殿門之西面南曰應天門北乾元門次北敷政門次北文

明殿次垂拱殿建禮門之西曰廣壽殿其北曰明德殿其次天和殿其次崇徽殿明福門內曰天福殿其次太清樓其次思政殿延春殿北曰武德殿明福門之西曰金鑿殿其次壽昌殿玉華甘露長壽乾陽嘉興殿金鑿之西曰含光殿殿東廊後有紫雲樓樓前射殿南有講武殿殿後有後殿後苑內有長春殿東宮在蒼龍門之西宮後有飛龍院西有散甲殿

宋太極殿 [玉海]西京大內正殿隋曰乾陽唐曰乾元明堂後改含元梁曰朝元後唐曰明堂晉曰宣德後復爲明堂太平興國三年改太極殿

太極殿 [玉海]太平興國三年改太極殿爲天興殿乾元
爲太極門車輅院門爲鑿和門將舊樓爲太清樓

宋垂拱殿 [玉海]唐洛陽亦有延英殿天祐元年詔每月一
五九開延英太平興國改垂拱殿

宋廣壽殿 [玉海]開寶九年四月六日西京南郊禮成大宴
廣壽殿在建禮門之西唐曰嘉慶

宋明德殿 天和殿 崇徽殿 [玉海]太平興國改廣壽第
二殿曰明德第三殿曰天和第四殿曰崇徽

宋福殿 [玉海]殿在明福門內
宋太清殿 思政殿 延春殿 [玉海]太平興國改唐寢殿

曰太清第二殿曰思政第三殿曰延春

按唐絳霄殿為寢殿宋改絳霄樓為太清樓改絳霄殿為太清殿

宋武德殿

〔玉海〕後唐端明殿天成元年以馮道趙鳳為學

士太平興國改為武德殿

宋金鑾殿

〔玉海〕祥符四年三月丁亥召輔臣於講武殿後

閱名花至金鑾殿召坐出再幸西京記示之

宋壽昌殿

玉華殿 長壽殿 甘露殿 乾陽殿 嘉興

殿 〔玉海〕太平興國改金鑾第二殿曰壽昌第三殿曰玉

華第四殿曰長壽第五殿曰甘露第六殿曰乾陽第七殿

曰嘉興

宋含光殿

射殿

見上洛陽宮

宋講武殿

〔玉海〕景德四年二月己巳次西京壬申宴從臣

于講武殿唐曰文思院毬場

宋長春殿

散甲殿

見上洛陽宮

按上諸殿俱在西京大內據玉海西京宮室合九千九百九十餘區在大內之可記者如此

宋神御殿

〔宋史〕真宗景德四年帝如西京謁諸陵詔西京

建太祖神御殿

按洛陽舊志殿在太祖誕生之地應天院內圖繪聖容于殿中今在府治東開夾馬營

宋帝華殿

〔玉海〕西京太宗神御殿曰帝華

宋奉真殿

安聖殿

崇真殿

〔宋史〕仁宗天聖元年三月

甲戌奉安真宗御容于西京應天院景靈宮奉真殿昭應宮安聖殿并洪福院鴻慶宮慈孝寺崇真殿

朱三聖殿 李濂通志天聖中欲置真宗神御而難于遺仁

宗因以殿後齋宮並置三殿曰三聖殿慶歷中名太祖殿

曰興先太宗曰帝華真宗曰昭考 以上洛陽

宋會聖宮 宋史仁宗天聖八年春正月作會聖宮于西京

永安縣以奉三聖御容 歐陽修會聖宮頌國家采漢書

原廟之制作宮於永安以備園寢

按會聖宮在今偃師東二十里北印鳳臺山上下臨洛水南與宋陵隔水相對宋時地入永安今隸偃師又攷中州金石錄會聖宮碑景祐元年立志載元祐九年建或係重修今據宋史宮作於天聖更在景祐前蓋天聖

偃師景祐立碑元祐重修也

偃師

夏頃宮 竹書紀年帝癸卽位居斟鄩築傾宮徐箋括地志

故鄩城在鞏縣西南淮南墜形訓傾宮旋室高誘曰傾宮

宮滿一頃旋以璇玉飾宮

按一統志禹封夏伯于鄩城帝癸居之築傾宮據高誘注地滿一頃固不若阿房建章之後然禹卑宮室而後世如此已不能鑽厥舊服矣自古亡國不一端峻宇雕牆其一也可不戒哉

隋洛口龍舟殿 太業雜記車駕幸江都自漕渠口下乘小

朱航行次洛口御龍舟皇后御翔螭舟其龍舟高四十五

尺濶五十尺長二百尺四重上一重有正殿內殿東西朝

堂周以軒廊中二重有一百六十房皆飾以丹粉粧以金

碧珠翠雕刻奇麗綴以流蘇羽葆朱絲網絡下一重長秋
 內侍及乘舟水手以素絲大條繩六條兩岸引進其引船
 人並名殿脚一千八十人並着雜錦綵粧襖子行纏鞋襪
 等分為三番皇后御次水殿名翔螭其殿角有九百人又
 有小水殿九名浮景舟並三重珠絲網絡已下殿脚為兩
 番番一百人諸嬪妃乘大朱航三十六名漾綵船並兩重
 加網絡殿脚百人又有朱鳥航蒼龍航白虎航元武航各
 二十四其架船人名船脚又有飛羽航六十青鳧舸十凌
 波舸十宮人習水者乘之又有五樓船三樓船二樓船板
 榻黃蔑舫並給黃衣夫又有平乘五百艘青龍五百艘

舳五百艘八擢舸二百艘舴舺舸二百艘並十二衛兵所
 乘載兵器帳幙兵士自乘不給夫發洛口部

按鞏邑當隋唐時幸無宮殿土木之擾然洛口龍舟其
 為煩費不支龍舟必在洛口者以數千百舳艦洛水不
 能容故皆置舟于洛水入河之處其
 上諸殿無可附附之于洛口可也

以上鞏縣

隋福昌宮

隋書地理志宜陽有福昌宮

唐書地理志福

昌縣因隋宮為名有故隋福昌宮顯慶三年復置

隋顯仁宮

隋書地理志壽安有顯仁宮

唐書魏徵傳太

宗幸洛次昭仁宮

即顯仁宮
政要同

多所譴責徵諫曰隋惟責不

獻食或供奉不精而至乎亡今正當兢懼戒約何令人悔
 不為奢
 方輿紀要顯仁宮隋置自西京幸東都以此為

中頓亦曰甘棠宮唐初討王世充史萬寶進軍甘棠宮是也後仍曰顯仁貞觀十一年幸顯仁宮

按李濂通志顯仁宮在府城皂澗洛陽志遂以顯仁宮入洛陽今考皂澗即宜陽之黑澗水經洛水逕宜陽縣故城南注黑澗水南出陸渾西山歷于黑澗西北入洛是皂澗在宜陽不在洛陽也

唐蘭昌宮 地理志河南福昌縣西十七里有蘭昌宮

按蘭昌宮或以為即福昌宮考唐志曰有蘭昌宮又曰有隋故福昌宮其非一宮明矣亦顯慶中置

唐連昌宮 地理志壽安西二十九里有連昌宮顯慶三年

置 李濂通志蘭昌宮一名玉陽宮 玉海元稹有詞

唐興泰宮 地理志壽安西南四十里萬安山有興泰宮長

安四年置并析置興泰縣 會要長安四年毀三陽宮取

其材木造興泰宮于壽安縣之萬安山左拾遺盧藏用諫不從 韋安石傳武后幸興泰宮議趨疾道安石曰此道版築所成非自然之固后為回輦 武三思傳建營興泰宮于萬壽山請太后歲臨幸

按興泰宮唐志言在壽安西南萬安山山在宜陽非洛陽之萬安山也洛陽志因萬安山之名遂誤以興泰宮入洛志又據三思傳宜陽之萬安山亦名萬壽山 以上宜陽

後魏離宮 嵩山志會善寺本魏孝文帝離宮魏亡為澄覺

禪師精舍隋開皇中賜名會善寺嵩嶽寺亦魏離宮

唐奉天宮 會要永淳元年七月造奉天宮於嵩山之陽宏

道元年十二月廢文明元年二月改為嵩陽觀 通鑑高

宗作奉天宮監察御史襄行李善感諫上不納自褚遂良
韓瑗之死中外以言為諱幾二十年及善感始諫天下皆
喜謂之鳳鳴朝陽

唐三陽宮 武后紀久視元年一月復于神都作三陽宮四
月如三陽宮

按宮在告成東
五里石淙水上

宋崇福宮 元梁宜崇福碑崇福宮踞嵩嶽之麓即漢萬歲
觀唐改曰太乙宋升為宮以太乙殿改祈真又曰保祥左
右建真宗元神本命二殿天聖中保祥北為真宗御容殿
像真獻后於西閣帳內供設提舉管勾以王祝釐離宮掖

其東殿閣千楹有奇累朝于此避暑有奕棊擣蒲泛觴三
亭

按宋崇福宮設提舉管勾諸官命朝臣領之其負重望
而忤時者悉投閒於此范希文仲淹韓持國維司馬君
實光及子康呂獻可誨程太中珣及子伯淳顯正叔頤
楊中立時李伯紀綱趙開封野李漢老邴朱晦菴熹曹
簡甫彥約徐允叔應龍劉德修光祖許成子奕崔正子
與之倪正甫思王資道居安晁以道說之張文潛來前
後凡二十二人

金承天宮 嵩山志承天觀金重慶元年建即隆唐觀故址
亦稱承天宮 以上登封

唐崎岫宮 李濂通志在永寧縣西五里唐顯慶二年建唐
建詩武帝去來紅袖盡野花黃蝶領春風

唐蘭峰宮

唐書地理志永寧縣西三十三里有蘭峰宮顯

慶三年置

以上永寧

唐紫桂宮

唐書地理志澠池西五里有紫桂宮儀鳳二年

置調露二年曰避暑宮永淳元年曰芳桂宮宏道元年廢

按紫桂避暑芳桂同宮異名故不另列

澠池

河南府志卷之六十終

河南府志卷之六十一

古蹟志七

觀 臺 樓 堂 室

觀

漢東觀

洛陽宮殿名南宮有東觀漢氏圖籍所在有石渠

石室延閣廣內蓄之於外府又有御史掌蘭臺秘書及麟

麟天祿二閣藏之於內禁威帝延熹二年始置秘書監官

秩六百石掌典書古今文字攷古今同異屬太常

按後漢紀和帝幸東觀覽書林安帝詔博士校定東觀是正文字和熹鄧太后嘗從曹大家受經書選諸儒詣東觀校書列傳中如曹褒集禮東觀黃香詣東觀讀未見書劉珍與劉駒駘馬融校定東觀五經諸子又與傅毅著中興以下名臣列士傳班昭就東觀踵成兄固漢書孔僂校書東觀李尤詣東觀受詔作賦張衡欲終成

漢家禮儀上疏請專事東觀竇章入東觀為校書郎高彪校書東觀後靈帝詔畫彪像以勸學者李勝為東觀郎鄧嗣與伏無忌延篤著書東觀崔實與朱穆邊韶等著作東觀盧植與蔡邕楊彪韓說等並在東觀蓋東漢圖籍多在東觀當時學者稱為老氏臧室道家蓬萊山以老子嘗為守臧史復為柱下史四方所記文書皆歸往下孔子入周考禮洛陽藏書之盛有自來矣迨光武都洛經牒秘書載之二千餘兩至於孝和三倍於前故漢代諸儒多入東觀讎校撰集專心研精著作之林於斯為盛

漢承風觀

陸機洛陽記東觀高闕十二間介于承風觀

漢白虎觀

章帝紀詔下太常將大夫博士議郎郎官及諸

生諸儒會白虎觀講議五經同異使五官中郎將魏應承制問侍中淳于恭奏帝親稱制臨決如孝宣甘露石渠故事作白虎議奏

按後漢列傳肅宗好古文尚書左氏傳詔達人講北宮白虎觀魏應習魯詩會諸儒於白虎觀丁鴻兼射聲校尉肅宗詔鴻與廣平王義及諸儒樓望成封巨郁賈逵等論定五經同異於白虎觀李育於白虎觀以公羊義難賈逵班固為元武司馬天子會諸儒講論五經作白虎通德論令固撰集其事書凡十卷四十四門爵號禮樂巡狩情性衣裳三綱六紀五刑三軍之事悉備皆東漢諸儒講論白虎之義

漢增喜觀

鄧氏紀有北宮增喜觀

漢聽訟觀

晉刑法志光武中興留心庶獄常臨聽獄訟躬

決疑事明帝即位常臨聽訟觀錄洛陽諸獄帝性既明察能得下姦故尚書奏決近於煩碎

漢平樂觀

水經注靈帝於平樂觀下起大壇上建十二重

五采華蓋高十丈壇東北為小壇復建九重華蓋高九丈

列奇兵騎士數萬人天子住大蓋下禮畢天子躬擐甲稱
 無上將軍行陣三匝而還設祕戲以示遠人故東京賦曰
 其西則有平樂都場示遠之觀龍雀蟠蜿天馬半漢應劭
 曰飛廉神禽能致風氣古人以良金鑄其形明帝永平五
 年長安迎取飛廉并銅馬置上西門外平樂觀今於上西
 門外無他基觀惟西明門外獨有此臺巍然廣秀疑即平
 樂觀也

按觀者觀也必有臺可臨觀故道元於上西門外求臺
 基不得而以西明門外之臺當之西明門在今白馬寺
 稍南其臺白名皇女臺非平樂觀臺也平樂觀在今
 白馬寺西北正當古洛陽上西門外今尚名平樂村

漢長樂觀 **高彪傳**靈帝時京兆第五永為督軍御史使督

幽州百官大會祖餞于長樂觀議郎蔡邕等皆賦詩彪獨
 作箴

漢承祿觀 玉海後漢有承祿觀清河王慶居之

漢臨洛觀 崔駰大將軍臨洛觀賦濱曲洛而立觀營高壤
 而作廬處崇顯以閒敞超絕鄰而特居列阿閣以環匝表
 高臺而起樓步輦道以周流臨軒檻以觀魚

漢百尺觀 綱目靈帝光和五年起百尺觀

魏聽訟觀 水經注聽訟觀故平望觀魏明帝常言獄天下
 之命也每斷大獄恒幸觀聽之以太和三年更從今名觀
 西北接華林隸簿昔劉楨磨石處也文士傳曰文帝之在

東宮也哀諸文學酒酣命甄后拜坐坐者成伏成一惟劉
楨平仰觀之太祖以為不敬送徒隸簿後太祖乘步牽車
乘城降觀簿作諸徒咸敬而楨操作磨石不動太祖曰此
非劉楨也石如何性楨曰石出荆山元巖之下外炳五色
之秀內秉堅貞之志雕之不加文磨之不加瑩稟氣貞正
稟性自然太祖曰名豈虛哉復為文學

魏崇文觀

魏志明帝置崇文觀徵善屬文者充之

王肅領祭酒

魏總章觀

魏志明帝青龍二年大治洛陽宮築總章觀建

翔鳳於其上使八方才人宮女尚書居之

魏凌霄觀

魏志明帝作凌霄觀

魏昌都觀

洛中記昌都觀都水使者陳熙造

晉宣武觀

武帝紀泰始九年臨宣武觀大閱諸軍十年帝

臨宣武觀大閱諸軍咸寧元年大閱於宣武觀三年帝臨

宣武觀凡五大閱太康四年大閱于宣武觀山濤傳武

帝常講武於宣武場濤時有疾詔乘步輦從因與盧欽論
用兵之本以為不宜去州郡武備時咸以濤不學孫吳而
闇與之合帝曰天下名言也而不能用

洛陽宮中九觀

陸機洛陽地記宮中有臨高凌雲宣曲廣

望闕風萬世修齡總章聽訟凡九觀皆高十六七丈以雲
母著窻裏日曜之煒煒有光輝

洛陽城外七觀 陸機洛陽地記 洛陽城外有宣陽千秋鴻

池泉城揚威石樓等觀城外又有禺中觀

洛陽城十八觀 華延雋洛陽記 洛陽城十八觀皆施元檻

鐵籠疏雲母幌

洛宮十一觀 建康宮闕簿 洛宮中有元覽觀東汜觀清覽

觀高平觀竹松觀見親觀高樂觀凌雲觀章臺觀宣曲觀

萬年觀

按自洛陽九觀以下或晉因魏舊或魏因漢舊不可以世代分故併附于晉代諸觀之後

後魏涼風觀 楊銜之伽藍記 西遊園中凌雲臺上有八角

井高祖於井北造涼風觀登之望遠目極洛川

後魏宣慈觀 伽藍記 凌雲臺東有宣慈觀去地一十丈

後魏景陽觀 伽藍記 華林園有清暑殿殿西有景陽觀

隋太微觀 大業雜記 端門即宮南正門重樓上名太微觀

隋紫微觀 大業雜記 則天門兩重觀觀上名紫微觀

隋通真觀 大業雜記 西苑內造山為海山上有通真觀

隋棲霞觀 見前甘泉宮內 以上洛陽

按周置兩觀以表宮門春秋作雉門及兩觀闕中為門謂之闕上可登觀謂之觀戴記所謂孔子遊于兩觀也漢後臺土架木皆曰觀不獨門闕為然然猶為天子遊觀之所唐以來率以祠老子者謂之觀於古名觀之義相去遂遠洛陽為王者都臺觀宜附宮闕後其

臺

臺

周鳳凰臺

李通志在府城北卽山鳳凰保副使周敘詩丹

穴九苞鳳來儀表禎祥先集于岐山後下于北卽一鳴帝

德盛再鳴王道昌

按鳳降北卽在成王之世今北卽有鳳凰臺

周公臺

李通志在府城東周公輔成王朝諸侯之所隋末

李密據金鏞營寢室於臺後

周雲臺

五行志雲臺周家所造圖書術籍珍玩寶怪所藏

周昆明臺

述征記周靈王二十三年起昆明之臺一名宣

昭之臺聚天下異木神工飾水精為泥臺高百丈升之以望雲色時有萇宏能招致神異王登臺忽見二人乘空而

至乘游飛之輦駕以青螭其衣皆縫緝毛羽王卽迎之

席時天下大旱地裂木燃一人先唱能為雪霜引氣一噴

則雲起雪飛坐者皆口禁井池冰堅可琢又設狐腋素裘

紫羆大褥是西域所至施于臺上又一人以指彈席上而

暄風入室裘褥皆棄臺下

周諺臺

說文周景王作洛陽諺臺

尺氏切

漢靈臺

水經注靈臺望雲物也漢光武所築高六丈方二

十步世祖嘗宴於此臺得走鼠

當作鼯鼠

於臺上亦諫議大夫

第五子陵之所居淪

當作倫

少子也以清正

疑脫為郡功曹

洛陽無

主人鄉里無田宅寄止靈臺或十日不炊司隸校尉南陽

左雄尚書廬江朱孟興等故孝廉功曹各致禮餉並辭不受

受

按摯虞三輔決錄注竇攸舉孝廉為郎世祖大會靈臺得鼠如豹文問羣臣莫知者攸對曰麀鼠也見爾雅攸按秘書如攸言賜帛百匹又靈臺十二門章帝有靈臺十二門詩

漢雲臺 淵鑑類函永平初以馬援女立為皇后顯宗圖畫

建武中名臣列將于雲臺以椒房故獨不及援東平王蒼

觀圖言于帝曰何不畫伏波像帝笑而不言

漢温明臺 東京記洛州温明臺後漢世祖晝卧此殿耿弇

入造牀下勸即位處

漢蘭臺 百官志御史中丞蘭臺令史六百石掌奏及印工

文書 王充論衡蘭臺之史班固賈逵楊終傅毅之徒名

香文美

漢臨照臺 水經注南宮有謔臺臨照臺

漢清源臺 玉海漢明帝遣郎中蔡愔秦景使天竺求佛經

得四十二章因立白馬寺其經緘于蘭臺石室又畫像于

清源臺及顯節陵上

按玉海引文苑英華並云清源又引冊府元龜云清涼臺以清源為清涼恐與改金根為金銀同舊志仿之誤

漢皇女臺 水經注皇女雅殤埋于臺側故名 雅當作稚互見前平樂觀

魏凌雲臺 書斷韋誕字仲將善書法題署尤精明帝凌雲

臺初成誤先釘榜未題署以籠盛誕輓轡長緝引上去地

二十五丈就點畫誕因危懼以戒子孫無為大字楷書

按水經注引洛陽記凌雲臺西有金市金市北對洛陽壘俱在金墉城南方輿紀要謂苻秦置戍于此晉大元八年丁零翟斌叛舉兵新安慕容鳳等歸之敗秦兵克凌雲臺戍是也又東晉末劉裕誅除宗室宗室多逃亡在河南司馬順明率眾保凌雲臺即此以寰宇記謂在水南保者為誤今攷水南保有水磨邨有漢雲臺圖二十八將故址寰宇記所指乃雲臺非凌雲臺也方輿紀要以雲臺凌雲臺為一而反疑寰宇記誤謬矣

魏九華臺 玉海文帝築凌雲臺又築九華臺

魏硯子臺 東京記魏硯子臺云是張儀家似硯也

魏辟寒臺 述征記魏明帝五年昆明國貢嗽金鳥帝將此

鳥畜于靈禽之園餽以珍珠飲以龜腦鳥常吐金屑如粟鑄之以器服畏霜雪乃起小屋以處之名曰辟寒臺皆用

膏為戶牖使內外通光而風霜恒隔宮人爭以鳥所吐之金用飾釵珮謂之辟寒金

魏燭臺 拾遺記文帝所愛美人薛靈芸未至京師數十里

膏燭之光相續不滅築土為臺基高三十丈列燭於臺下名曰燭臺望之如列星之墜地

後魏臨雲臺 伽藍記永寧寺九層浮圖為火所燒帝登臨

雲臺望火當時雷雨晦冥雜下霰雪火經三月不滅有入地柱火尋柱周年猶有煙氣後有人來云見浮圖於海中

後魏靈芝鈞臺 伽藍記西遊園中涼風觀東有靈芝鈞臺

累木為之出于海中去地二十丈風生戶牖雲起棟梁刻

石為鯨魚背負釣臺既如從地踊出又似空中飛下釣臺凡四殿皆有飛閣向靈芝往來三伏之日皇帝在靈芝臺避暑

後魏臨危臺 伽藍記華林園清暑殿西有臨危臺

後魏靈臺 伽藍記雙女寺東有靈臺基址雖頽猶高五丈

餘即漢光武所立汝南王復造輓浮圖于靈臺之上

按伽藍記有駱子淵者自云洛陽人成彭城同營樊元寶假還京師子淵附書云宅在靈臺南近洛水鄉元寶如言至靈臺南了無人家徒倚欲去忽見老公問從何來元寶具向道之老公曰是吾兒也取書引元寶入見屋宇佳麗坐命婢取酒兼設珍羞飲訖辭還老公送別甚殷勤還入不復見其門巷但見高岸對水綠波漣漪元寶與子淵同成三年不知是洛水之神也據記所稱鬼成蓋後魏孝昌時妖賊四侵州郡失據設募靈臺人

苦征戍豈非妖由人興與抑作記者寓言鬼物譏朝廷征戍煩興雖鬼神亦不免耳

後魏凌雲臺 九華臺 鹿苑臺 閱武臺 含章臺

隋建章臺 麗春臺 麗日臺 月輪臺 雲光臺 集靈臺

臺

按自凌雲以下諸臺見玉海歷代臺名而不繫以地不必盡在洛陽如凌雲九華後魏承曹魏舊址當在洛陽若闕武臺據後魏孝文紀太和十八年北巡幸闕武臺乃在陰山其餘可知攷洛陽舊志自鹿苑臺以下合隋建章諸臺併目為隋臺而曰俱在洛陽時代既舛屬隸亦妄蓋以後魏及隋並都洛陽遂誤以兩代臺名俱在洛陽也且誤以建章為建樂月輪為日輪集靈為染靈更多黃龍千秋萬歲誤殿為臺謬戾多端悉為正之

隋行雨臺

見前甘泉宮

手不見臺

天業雜記閭闔重門南北並有仰觀臺

兩京

記東都闕北及南皆有觀象臺女史仰觀之所

李密龍虎臺 李通志在府城東李密築以閱武

唐黃臺 李通志在洛陽唐章懷太子有種瓜黃臺下之句

唐麗春臺 玉海兩京記東都城有流杯殿在麗春臺北有

東西廊南至麗春臺北連宏徽殿南頭皆亭子間以山池

殿上作漆渠九曲

唐宿羽臺 通鑑長安三年十一月宴突厥使於宿羽臺太

子預焉

按洛陽舊志於唐並列鸞臺麟臺等據百官志垂拱元年改秘書省曰麟臺門下省曰鸞臺與隋內史省謁者臺皆臺省之名不可入臺觀門中

又按隋大業三年增謁者司隸與御史為三臺唐文明元年御史臺改肅政臺又分左右臺光宅元年尚書省改文昌臺長安三年日中臺龍朔二年改秘書省曰蘭臺皆官制非臺名也今於舊志既削去而漢蘭臺猶存其名何也漢雖有蘭臺令史之官而文選賦注曰蘭臺臺名校書處則不妨列臺觀中矣

宋梅臺 李通志在府城張明叔宅司馬光有記

按富鄭公園湖園皆有梅臺見後各園內

宋天光臺 李通志在府城內宋富弼歸老時所築元豐三

年有星隕弼升臺焚香再拜知其將終

宋賞幽臺 見富鄭公園 風月臺 繡野臺 俱見環園 見山臺

紫金臺 見張氏園 玩月臺 見胡氏園 以上洛陽

周望江臺 李通志在偃師縣伊水上周劉康公所築

可有府志

卷之六十一 古蹟志

臺

按中州無江以望江各臺不知何據

偃師

古夏臺

方輿紀要

夏臺湯囚處史記韓世家釐王十年秦

敗我師于夏山或曰即夏臺也司馬貞曰夏臺亦曰鈞臺

夏獄名郡志臺在鞏縣西南與永安故城相近

按夏啟有鈞臺之享享者朝享也說者多以鈞臺在今禹州司馬氏以鈞臺即夏臺因夏啟朝諸侯而名夏今夏臺在鞏則禹州之鈞臺不得專彼為是矣且夏桀居鞏之對鄩當時或因朝享諸侯而囚湯未可知也

李密黃冶臺

李通志在鞏縣東南即李密與李淵相拒處

其址尚存

以上鞏縣

周觀兵臺

李通志在孟津縣東周武王觀兵于此一名選

將臺

按漢儒以泰誓觀政為觀兵附會于序書十有一年篇首十有三年而為周師再舉之說程子謂以兵脅君必無此理則觀兵臺之名不存可也且又稱選將亦非周代名字恐即水經注所謂高祖講武場也誤傳為周耳

周歇鶴臺

李通志在孟津縣舊河清縣西北三十里世傳

王子晉浮邱公遊王屋歇于此

以上孟津

周測景臺

李通志在登封縣東南古陽城縣內周公定此

地為土中立土圭測日以驗四時之氣

周觀星臺

李通志在測景臺北周公所築

按唐志河南府陽城縣有測景臺會要儀鳳四年太史令姚元辯奏于陽城測景臺依古法立八尺表夏至日中測景一尺五寸正與古法同調露元年於陽城周公測景所得土圭長一丈二尺七寸又開元十一年詔太史監南宮說刻石表焉今登封告縣有石表刻周公測景臺五字仿佛可識蓋說所刻也後人據此遂謂測景

唐蹟非周蹟夫唐于陽城測景固因周公舊蹟而為之
在爾時已先有臺乃奏依古法併為刻石非全無遺蹟
妄曰為周公也至所得土圭尺寸為周公制否不可知
今依周官土圭法求之則唐所得土圭乃冬至之景長
非夏至之景長仰冬至八尺臬之表景亦不止丈二尺
七寸當是唐尺周尺長短不同依法求之更可得唐尺
長于周尺之數至觀星臺築于周公
通志云爾他無可據存其說可也

漢登仙臺 玉海戴延之西征記漢武帝作登仙臺在少室

峯下

按玉海引西征記登仙臺在少室峯下又斷文謂淮南
王安立思仙臺說嵩割裂上下文合為一乃稱玉海曰
思仙臺在少室峯下淮南王築遂使登封登仙臺之
外多一思仙臺如此牽合後人不見原本何處考辨

漢集仙臺 李通志集仙臺在登封縣東北八里漢武帝築

漢金鷲臺 李北海嵩嶽寺碑漢武建金鷲之臺 嵩書在

縣城北一里

漢玉女臺 李通志在登封縣東四十五里與嵩高連亘漢

武帝東遊過此見仙女因名 以上登封

倉帝造字臺 路史禪通紀倉帝史皇氏實有睿德生而能

書及受河圖綠字於是窮天地之變仰觀奎星圓曲之勢

俯察龜文鳥羽山川掌指而剏文字形位成文聲具以相

生為字羅莘註河圖玉版云倉頡為帝南巡狩登陽虛之

山臨於元扈洛汭之水靈龜負書丹甲青文以授

按陽虛元扈在今永寧則造字臺遺蹟有自來矣但據
路史倉帝造字仰觀俯察固非一端必謂受龜書于元
扈乃造文字猶未為通論也又長安三會
寺亦有倉頡造書堂羅莘註以為未然

古蹟志

臺

夏鹿臺 名勝志鹿臺在永寧縣北相傳洪水時禹至此見

一山獨出此臺又謂之高霞臺 以上永寧

戰國會盟臺 李通志會盟臺在澠池縣西秦昭王與趙惠

王會盟于此 澠池

樓

魏凌雲樓 世說凌雲樓樓觀極精巧先稱平衆材輕重當

宜然後造構乃無緇銖相負揭臺雖高峻恒隨風搖動魏

明帝登臺懼其勢危別以大材扶持之樓卽頽壞論者謂

輕重力偏故也

魏層樓 見都邑金墉城下

魏百尺樓 水經注大夏門故夏門陸機與弟書云門有二

層高百尺魏明帝造

晉鳳皇樓 儀鳳樓 翔鳳樓 慶雲樓 伺星樓 晉宮

閣名洛陽有鳳皇樓總章觀儀鳳樓在觀上廣望觀之南

又別有翔鳳樓又有慶雲樓伺星樓

後魏西北樓 伽藍記清河王懌勢傾人主第宅豐大西北

有樓出凌雲臺俯臨朝市目極京師古詩所謂西北有高

樓上與浮雲齊者也

唐廣達樓 唐書王君奭傳開元十四年君奭破吐蕃奏凱

還元宗宴君奭及妻夏於廣達樓賜金帛玉海注夏亦自

以戰力封武威郡夫人 李濯賦建崇樓於闕下聳飛閣於城隅德陽傍倚少室前瞻

唐五鳳樓 通鑑開元二十三年正月上耕藉田都城醮三

日上御五鳳樓醮宴 元德秀傳為魯山令元宗在東都

醮五鳳樓命三百內縣令刺史各以聲樂集德秀惟樂工

數十人連袂歌于薦 詳見人物

唐浴日樓 韋述兩京記上陽宮有麗春臺浴日樓

五代梁五鳳樓 五代史羅紹威傳太祖即位將都洛陽紹

威取魏良材為五鳳樓朝元前殿浮河而上立之京師太

祖嘆曰吾聞蕭何守關中為漢起未央宮豈若紹威越千

里而為此若神化然功過蕭何遠矣

宋紫雲樓 玉海西京含光殿東廊後有紫雲樓

宋日月樓 玉海西京太極殿前有日月樓日月華門

按洛陽舊志誤以紫雲為紫陽且誤以太清紫雲日月等樓列為唐蹟今悉依玉海而正之

宋太清樓 玉海西京天福殿之次有樓後唐曰絳霄太平

興國三年改為太清樓寢殿曰太清

宋五鳳樓 玉海西京大內正南門曰五鳳樓國初建名祥

符四年三月丁亥祀汾陰回駐蹕將賜醮有司請改五鳳

樓名上曰太祖建樓因瑞應建名不可更也已丑上御五

鳳樓觀醮三日

宋雙桂樓

李濂通志在府治宋天聖間錢惟演留守西都

時建

按歐陽公曰余居府中時嘗謁錢思公子雙桂樓下見一小屏後細書字滿其上思公指之曰欲作花品此是牡丹名凡九十餘種

以上洛陽

閣附

漢阿閣

後漢馬援傳馬嚴顯宗時拜將軍長史將五軍五

校士羽林禁兵三千人屯西河美稷衛護南單于聽置司

馬從事牧守謁敬同之將軍救嚴過武庫祭蚩尤帝御阿

閣觀其士衆時人榮之

玉海閣有四阿謂之阿閣

漢仁壽閣

隋志明章重儒術四方鉅儒鴻生負袞自遠而

至者不可勝筭石室蘭臺彌以充積於東觀及仁壽閣集

新書校書班固傅毅等典掌焉並依七畧為書部因又編

為漢藝文志

玉海顯宗詔馬嚴留仁壽閣定建武註記

漢東觀藏書閣

班昭傳班固著漢書其八表及天文志未

竟和帝詔昭就東觀藏書閣踵而成之

漢石渠閣

廣內閣

秘書閣

麒麟閣

天祿閣

見前東觀下

按石渠天祿並起西漢迨東漢遷都猶仿其制故洛陽宮殿名亦有之

漢魏洛陽閣總數

洛陽宮殿簿高平觀南行至清覽觀高

閣二十四間修齡觀南行至臨商觀高閣五十五間太極

殿前南行仰閣三百二十八間南上總章高閣十三間永

閣

寧宮連閣二百八十六間連閣上下數見親觀差閣九間

洛陽地記雲臺高閣十四間乘風觀閣十二間丹陽

記漢魏殿觀多以複道相通故洛宮之閣七百餘間

晉秘書中外三閣唐六典秘書省中外三閣掌典圖書古

今文字皆在禁中兩漢或徙金馬外歷代不常其處注晉

惠帝永平元年詔別置秘書寺掌中外三閣圖書

後魏虹霓閣伽藍記華林園內有大海海內作蓬萊山竝

作虹霓閣乘虛來往

唐臨渡閣閭闔閣東京記紫微宮有臨渡一作閭闔閣

宋崇德閣李濂通志在洛陽司馬光與邵雍期會于崇德

閣邵後至光有詩林端高閣望已久花外小車猶未來

宋懷古閣報政閣尊賢閣三閣見洛陽朝市圖

按朝市圖碑在舊府治門內之西圖已剝泐不可識下
裁僅存數字乃元至正年號則閣之為宋為元不可知
姑仍舊
志可也

漢東閣玉海永平初東平王蒼為驃騎將軍開東閣延英

雄

漢黃閣宋志三公黃閣前史無其義禮記士鞮與天子同

公侯大夫則異鄭元注云士賤與君同不嫌也夫朱門洞

開當陽之正色也三公之與天子禮秩相亞故黃其閣以

示謙漢舊制也

漢省閣 〔玉海〕楊賜拜太尉中平元年被召會議詣省閣切

諫

晉金光閣 文成閣 青陽閣 朱明閣 承休閣 安樂

閣 白藏閣 顯仁閣 崇明閣 章德閣 飛雲閣

安世閣 長安閣 見晉官閣名俱在洛陽內

後魏東上閣 西上閣 〔玉海〕後魏崔光乘步挽至東西上

閣

堂 堂皇附

周明堂 〔孔安國家語〕孔子觀乎明堂觀四門墉有堯舜之容桀紂之象而各有善惡之狀興廢之戒焉又有周公相

成王抱之負扆南向以朝諸侯之圖焉孔子徘徊而望之謂從者曰此周之所以盛也

按周禮季秋享帝于明堂以文王配所謂宗祀文王于明堂以配上帝也明堂即文王廟非廟外別有明堂其王者朝諸侯之所亦曰明堂仿王路寢之制王者每月所居隨方開門先儒所謂元堂之右个即青陽之左个青陽之右个即明堂之左个是已一明堂也或為廟或為寢何也禮家謂室有東西夾曰廟無東西夾曰寢其制固不大相遠故祀上帝于文王廟曰明堂王者之所居亦曰明堂漢以後如公玉帶之走紛綬建議合諸禮經固未見其有合也存其說可矣

漢明堂 〔水經注〕穀水又逕明堂北漢光武中元元年立尋其基構上圓下方九室重隅十二堂蔡邕月令章句同之故引水於其下為璧雍

漢玉堂 官者傳使鈞盾令繕修南宮玉堂又鑄四鍾垂於玉堂及靈臺殿前

漢萬金堂 續漢書中平二年造萬金堂於西園

漢纂食堂 文獻通考在洛陽西南即長壽宮

魏東西堂 玉海洛宮之號起自魏東西堂亦魏制於周小寢也

魏苗茨堂 伽藍記華林園有石碑魏明帝所立題曰苗茨

之碑高祖於碑北作苗茨堂永安中牟莊帝馬射於華林園白官皆來讀碑疑苗字誤國文王李同軌曰魏明英才世稱三祖公幹仲宣為此本意如何不得

陣前之圖誤

言誤也街之時為奉朝請因即釋曰以蒿覆之故言苗茨

何誤之有衆咸稱善以為得其旨歸

按玉海引水經注有茅茨堂前有茅茨碑不言苗茨恐傳寫之誤耳楊街之日見石碑因以生解當無誤

晉宣猷堂 文選陸士衡有皇太子宴元圃宣猷堂詩注宣

猷堂名在園中

晉堂名 玉海晉宮閣名洛陽有則百堂螽斯堂休徵堂延

祿堂仁壽堂綏福堂含芳堂樂日堂 一作樂昌堂 椒華堂

芳音堂顯成堂承光堂五福堂嘉寧堂堯母堂永光堂長

壽堂

按玉海引晉宮閣名與藝文類聚少異玉海所引堂名凡十七類聚所引堂名止十二淵鑑類函所引與類聚

同類聚中又多一承慶堂不列者類見洛陽宮殿簿尚詳在後也

晉太學講堂 水經注陸機言太學贊別一碑在講堂西

後魏清徽堂 凝閑堂 茅茨堂 在城王澄傳車駕還洛

引見王公侍臣於清徽堂帝曰此堂成來未與王公行宴樂之禮後東閣廡堂粗復始就故今與諸賢欲無高而不升無小而不可入因之流化渠洗煩池次之凝閑堂帝曰此堂取夫子閑居之義不可縱奢以忘儉自安以忘危故此堂後作茅茨堂謂李冲曰此東曰步元廡西曰遊凱廡此座雖無堯舜之君卿當無愧元凱冲對曰臣既遭逢堯舜之君不敢辭元凱之譽

後魏光極堂 高祖紀太和十九年十二月朔引見羣臣於

光極堂宣示品令為大選之始

後魏法流堂 胡太后傳幸西林園法流堂命侍臣射不能

者罰之又自射鍼孔中之大悅賜左右布帛有差

後魏西栢堂 于忠傳世宗崩肅宗即位忠與門下議以肅

宗幼年未親機政太尉高陽王雍屬尊望重宜入居西栢

堂省决庶政

後魏都亭堂 水經注渠水南入華林園瑤華宮南歷景陽

山北山在都亭堂上結方湖湖中起御座石也御座前建

蓬萊山曲池接筵飛沼拂席南面射侯夾席武峙背山堂

上則石路崎嶇巖嶂峻嶮雲臺風觀纓帶阜遊觀者升
降耶閣疑作阿閣出入虹陛望之狀鳧沒古本作鳥沒一作鳥沒吳本改作鳧沒
鸞舉矣其中引水飛翠傾瀾瀑布或枉渚聲溜潺潺不斷
竹栢蔭於層石繡薄叢於泉側微飈暫拂則芳溢於六空
入為神居矣

後魏都堂 伽藍記華林園奈林西有都堂堂東有扶桑海

按伽藍記華林園都堂疑即水經注所謂都亭堂也

後魏國子學堂 伽藍記國子學堂內有孔□像顏淵問仁

子路問政在側

按伽藍記在後魏時佞佛不知尊聖固無足怪但言塑二賢侍側不知於問仁問政作如何塑令人失笑

後魏涼風堂 伽藍記建中寺本闍官司空劉騰宅有涼風

堂本騰避暑處妻涼常冷經夏無蠅有萬年千歲之樹

後魏文栢堂 伽藍記河間王琛造文栢堂形如徽音殿

後魏退賓堂 伽藍記清河王懌有退賓堂製如清暑殿

後魏萬年堂 見洛陽志

按魏書皇后列傳曰初高祖預營壽宮於方山及遷洛陽乃白表瀍西以為山園之所而方山虛宮至今猶存號曰萬年堂是萬年堂在方山不在洛陽瀍西也洛舊志謂瀍西有萬年堂誤

後魏堂名 玉海歷代堂名後魏有雲母九華光極華休

淵鑑類函洛陽宮殿簿有九華芳香琴堂百戲堂徽音堂

承慶堂昌福堂嘉德堂虛德堂修成堂

按玉海後魏有九華堂洛陽宮殿簿亦有九華堂但宮殿簿九華外尚有九堂各不詳所起附九華而見又洛陽舊志後魏列皇信堂攻魏書記皇信堂事尚在未遷洛前則皇信在代不得入洛

隋東西朝堂 大業雜記則天門南八十步過橫街道東有

東朝堂道西有西朝堂

隋射堂 大業雜記儀鸞殿南有射堂對閭闔門

唐棠杖堂 李通志在洛陽縣舊洛州治中唐永徽初賈敦

頤弟敦實前後為刺史並有惠政後人為建此堂

唐綠野堂 裴度傳時閹監擅威天子擁虛器縉紳道喪度

不復有經濟意乃置第東都集賢里午橋作別墅具煥館

涼臺號綠野堂激波其下度野服蕭散與白居易劉禹錫

為文章把酒窮晝夜相歡不問人間事

唐中隱堂 即舊金谷園白居易有詩刻石

唐七葉堂 見白居易詩 映日堂 在履道坊

唐九老堂 唐書白居易傳居易稱香山居士嘗與胡杲吉叟

鄭據劉真盧真張渾狄兼謨盧貞燕集皆高年不事者人

慕之繪為九老圖 李通志九老謂胡杲吉叟劉真台鄭

據盧慎張渾李元爽僧如滿并居易也

按唐書與通志所列九老不同通志乃據白傳自序以狄兼謨盧貞年未七十雖與會而不及列圖中無此兩人故不數唐書有狄兼謨盧貞而無李元爽如滿蓋據初會七人並與會二人數之實與九老繪圖不合考胡杲八十九吉叟八十八劉真八十七鄭據八十五盧真八十二張渾七十七居易七十四合之得五百八十二

居易詩二作四譌又李元爽百三十六僧如滿九十六詩止七人未及數吉跋或作吉皎又作收劉真或作真台或作貞台盧慎或作真狄兼謨或作狄並譽王世貞題九老圖又言洛社耆英可備異說

唐石經堂 李通志在府城內褚良築朱伯賢有記

宋五知堂 宋史任布仕至樞密副使致仕歸洛作五知堂

謂知恩知道知命知足知幸也

宋耆英堂 李通志在府城東舊資聖院宋文彥博留守西

都慕唐九老乃集洛中公卿大夫年德齊者為耆英會繪

像堂中凡十三人文彥博富弼席汝言王尚恭趙丙劉几

馮行已楚建中王慎言張問張燾王君貺司馬光也

宋淵映堂 灑水堂 湘膚堂 藥圃堂 見文潞公東園

宋竚瞻堂 李通志洛人為留守文彥博建彥博司馬光俱

有記

宋還政堂 李通志在府城宋富弼還政歸老時所建

宋紫筠堂 卧雲堂 四景堂 見富鄭公園

宋非非堂 李通志在府城歐陽修有記

宋讀書堂 見温公獨樂園 三畏堂 尹和靖築

宋含碧堂 見董氏東園

宋涼堂 見劉給事園

宋百花堂 四并堂 桂堂 見湖園

金報恩堂 李通志在洛川驛東金留守強伸建刻詔文于

石願以死自效云

元梅花堂 李通志在府治後以前有梅花六株故名世傳

王世充建元熊正德有記

元舒嘯堂 李通志在府城南伊水側元孫伯紹築

洛陽堂皇 洛陽記洛陽山中都亭堂皇大小屋五十間植

五果本竹栢之屬有五千七百二十九株 一作三十五 洛陽

宮殿簿洛陽有桃間堂皇奈間堂皇竹間堂皇李間堂皇

魚梁堂皇醴泉堂皇 淵鑑類函宮殿簿又有百戲堂皇

按淵鑑類函後漢胡建為軍正斬
監察御史於堂皇上堂無壁曰皇

以上洛陽

宋燕堂 富鄭公記佐著作樂君宰福昌才於治劇法令罕

任一日得廳背露地 誅叢薄作為是室以納休燕 宜陽

唐盧鴻草堂 唐書隱逸傳盧鴻字顥然洛人徵諫議大夫

請還嵩山勅有司治宅鴻自名其所居曰草堂聚生徒講

習其中所著有十志

宋盡心堂 李通志在登封縣治宋縣令管景文建李豸作

記 以上登封

明壽樂堂 通志在嵩縣崇臺上洪武元年指揮任亮守嵩

因仁智亭舊基構堂為讀書講藝之所其址尚存 嵩縣

室

周藏室 史記列傳老子者周守藏室之史

漢織室

馬后紀置織室蠶于濯龍中數往觀視以為娛樂

漢畫室

百官志畫室署長一人本注宦者主中宮別處

漢記室

百官志記室令史主上表章報書記

漢冰室

水經注東京賦注諫門冰室門宣陽門內有宣陽

冰室周禮有冰人日在北陸而藏之西陸朝覲而出之冰

室舊在宣陽門內故名

漢避雷室

御龍室 楊龍驤洛陽記顯揚殿北有避雷室

西有御龍室

漢室名

洛陽宮殿名洛陽有望舒涼室含章鞠室靈芝鞠

室清凉暑室

漢石室

後漢書李固對策曰宜開石室陳圖書

漢廣室

陰興傳受命於雲臺廣室

後魏藏冰室

温風室 伽藍記華林園海西有藏冰室六月

月出冰以給百官海西南有景山殿東有義和嶺嶺上有

温風室

按晉宮閣名洛陽宮內有義和温房

以上洛陽

晉慎終之室

晉書稽含自號毫邱子門曰歸厚之門室曰

慎終之室

詳見人物

鞏縣

後魏冰室

水經注河水南對首陽山朝廷置冰室於斯阜

室內有冰井常以十二月採冰於河津之隘峽石之阿北

陰之中而內於井室

孟津

嵩山石室

嵩高山記

山下巖中有石室中有自然經書自

然飲食

登封

河南府志卷之六十二

古蹟志八

苑園 園圃

苑園

漢靈囿

東京賦悉率百禽鳩諸靈囿

按漢書注養鳥獸曰苑苑有垣曰囿

上林苑

明帝紀永平十五年冬車騎校獵上林苑

和

帝紀永元五年詔自京師離宮果園上林廣成圃悉日假

貧民恣得悉捕不收其稅

桓帝紀延熹元年幸上林苑

六年幸函谷關上林苑

靈帝紀光和五年校獵上林苑

歷函谷關遂狩於廣成苑

按楊賜傳注上林在洛陽西謂古洛陽也故方輿紀要謂上林苑在今府城東以古洛陽西猶今府城東也然據漢書則上林苑宜近函谷關在今府城西接新安界蓋廣成苑為今嵩縣地若上林在今府城東則校獵上林罷宜直南歷伊闕至廣成不

漢芳林苑 支選薛綜注洛陽圖經曰芳林苑名

漢西苑 順帝紀陽嘉元年起西苑修飾宮殿

漢鴻德苑 東觀記延熹元年置鴻德苑置令秩六百石

漢顯揚苑 桓帝紀延熹二年造顯揚苑置丞 方輿紀要

顯揚苑在故洛陽城西中平六年袁紹等誅宦官董卓自顯揚苑急進至城西聞帝在北因與公卿奉迎北即坂下

漢平樂苑 楊賜傳注洛陽宮殿名有平樂苑

漢東畢圭苑 西畢圭苑 靈帝紀光和三年作畢圭苑

注畢圭苑有二東畢圭苑周一千五百步中有魚梁臺西

畢圭苑周三千二百步並在洛陽宣平門外 方輿紀要

初平二年董卓逼車駕西遷卓留屯畢圭苑中是也

漢靈琨苑 楊賜傳代劉郃為司徒帝欲作畢圭靈琨苑賜

上疏諫曰先帝之制左開鴻池右作上林不奢不約以合

禮中今猥規郊城之地以為園囿壞沃衍廢田園驅居人

畜禽獸殆非所謂保赤之義今城外之苑已有五六可以

逞情意順四節也宜惟夏禹卑宮太宗露臺之意帝問任

芝樂松等曰無害遂令築苑

漢長利苑 高望苑 始昌苑 萬歲苑 漢平苑

按諸苑俱見玉海後漢苑名故洛陽舊志有之

漢菟苑 梁冀傳多括林苑禁回王家西至宏農東界滎陽

南極魯陽北達河淇包含山藪遠帶邱荒周旋封域殆將千里又起菟苑於河南城西綿亘數十里發屬縣卒徒繕修樓觀數年廼成移檄所在調發生菟刻其毛目為識有犯者罪至死嘗有西域賈胡誤殺一菟坐死者十餘人

按人臣未有敢以苑名者冀橫如此故附入苑園中以著其不臣

晉平樂苑 鹿子苑 桑梓苑 初學記晉有平樂鹿子桑

梓諸苑並在洛陽 河南十一境簿洛陽城西有桑梓苑

隋西苑 大業雜記元年築西苑周二百里其內造十六院

屈曲周繞龍鱗渠一延光二明彩三合香四承華五凝輝六麗景七飛英八流芳九耀儀十結綺十一百福十二善十三長春十四永樂十五清暑十六明德置四品夫人十人各主一院庭植名花冬剪雜綵為之色渝則改沼內冬月亦剪綵為菱荷院門並臨龍鱗渠其外遊觀之處復有數十為海周十餘里有方丈蓬萊瀛洲諸山每月夜帝引宮人三五十騎開闔闔門入西苑歌管達曙作清夜遊曲數十首奏之

隋會通苑 兩京記東都苑隋日會通又改為芳華神都苑

周迴一百二十六里東面七十里南面三十九里西面五十里北面二十四里 方輿紀要義寧二年唐世子建成等援東都軍于芳華苑東都開門不出李密出軍爭之小戰各引去

唐洛陽苑 唐儉傳從太宗獵洛陽苑羣豕突出於林帝射四發輒殪四豕一豕躍及鐙儉投馬搏之帝拔劍斷豕顧笑曰天策長史不見上將擊賊耶何懼之甚對曰漢祖以馬上得之不以馬上治之陛下神武定四方豈復快心於一獸帝爲罷獵

唐禁苑 六典禁苑在皇都之西北拒北即西至孝水南帶

洛水支渠穀洛二水會於其間周回一百二十六里中有合璧冷泉高山龍鱗翠微宿羽明德望春青城黃女陵波十有一宮芳林金谷二亭凝碧之池開元二十四年敕河南尹李適之修積翠上陽月陂 方輿紀要禁苑東距上陽宮七里西面四門南曰迎秋次遊義次籠烟北靈溪苑中有三陂一積翠二月陂三上陽以穀洛二水泛溢故爲三陂以防之隋大業二年集四方散樂於東京閱之於芳華苑積翠池側貞觀十年宴洛陽西苑泛積翠池十二年獵於洛陽苑開元二十年幸東都宴百官於上陽東洲天寶以後亦曰西苑建中四年李希烈以淮西叛圍鄭州游

騎西至彭婆留守鄭叔則入保西苑是也

按隋之西苑即唐之禁苑隋西苑亦曰會通又改芳華唐禁苑又改神都隋十六院在苑中唐上陽宮亦在苑中但十六苑與上陽宮雖通得苑名而東連都城猶在苑東故方輿紀要謂禁苑東去上陽七里也

唐上苑 全唐詩註天授二年臘卿相欲詐稱花發請幸上苑有所謀也許之尋疑有異圖乃遣使宣詔云明朝遊上苑

苑有所謀也許之尋疑有異圖乃遣使宣詔云明朝遊上苑苑火急報春知花須連夜發莫待曉風吹凌晨名花布苑羣臣咸服其異后之以術移唐祚如此

唐東都苑監 玉海永淳元年置東都苑總監未置以前隸

司農百官志京師諸園苑苑四齋監各一人掌葺宮

館園池顯慶二年水會效宮監曰東都苑北面監明德宮

監曰東都苑南面監洛陽宮監曰東都苑東面監食貨監

曰東都苑西面監 以上洛陽

晉鹿苑 水經注晉後略曰成都王穎使吳人陸機為前鋒

都督伐京師輕進為治軍所處大敗於鹿苑人相登躡死於塹中及七里澗澗為之滿

按鹿苑在古雒陽城東今故城東地盡隸偃師則鹿苑宜入偃師古蹟矣

白水苑 陶季直京邦記覆舟山周迴二十里許其下有林

號白水苑

按名勝志覆舟山在偃師今偃師西北山是已引京邦記謂白水苑在其下而不詳何代考玉海六朝苑名有白水又不在北方且類函引書作陶季直各勝志作陶季述似有誤

以上偃師

唐興泰宮苑

淵鑑類函武后作興泰宮於萬安山盧藏用上疏曰陛下離宮別館多矣又窮人力以事土木臣恐議者以陛下為不愛人而奉己也且頃歲穀雖頻登而百姓未有儲陛下巡幸訖靡休息斤斧之役歲月不空而又廣宮苑臣恐下未易堪

按淵鑑類函已采入苑園門中雖別無苑名而宮苑連稱爾時固自有苑也

宜陽

漢廣成苑

後漢帝紀安帝以廣成游獵地假與貧民順帝永和四年幸廣成苑桓帝延熹元年校獵廣成六年校獵廣成靈帝光和五年狩於廣成 郡國志河南新城有廣成苑 鍾離意傳顯宗時為尚書僕射車駕數幸廣成

苑意當車諫以為從禽廢政天子即時還宮

馬融傳鄧

太后臨朝隲兄弟輔政而俗儒世士以為文德可與武功

宜廢遂寢蒐狩之禮息戰陳之法故猶賦從橫乘此無備

融乃感激上廣成頌以諷諫

嵩縣

園圃

莊附

漢濯龍園

百官志濯龍監一人 本注濯龍亦園名近北宮

漢南園

百官志南園丞一人 本注南園在洛水南

漢西園

東京賦歲惟仲冬大閱西園 注西園上林苑 拾

遺記靈帝初平三年遊於西園起裸遊館千間引渠水繞

砌周流澄澈乘船以遊使宮人執篙楫盛暑奏招商之歌

以來涼氣歌曰涼風起今日照渠青荷晝偃葉夜舒惟日不足樂有餘清絲流管歌玉息千年萬歲喜難踰渠中植蓮大如蓋長一丈南國所獻其葉夜舒晝卷一莖四蓮叢生名曰夜舒荷亦曰望舒荷帝避暑裸遊館宮人皆靚粧解上衣或共裸浴煮西域茵墀香為湯以餘汁入渠名流香渠又作雞鳴堂醉迷天曉內侍競作雞鳴以亂真聲乃以炬燭投於殿前帝乃驚悟董卓亂後投燭處有光如星後人於其地立小屋名曰餘光祠

漢直里園 百官志直里監一人四百石注直里園在洛陽城西南角

漢憲園

敬園

逍遙園

名勝志洛陽記云漢憲園在縣

東北冲帝母虞美人拜憲園貴人即此又有敬園安帝祖母朱貴人所居及逍遙園皆後漢時園也

漢霜林園

拾遺記恒山獻巨桃霜下結花隆暑方熟亦曰

仙人所食明帝使植於霜林園園皆植寒菓積冰之節百菓方盛俗謂相陵與霜林聲譌也后曰王母之桃王公之瓜可得而食吾萬歲矣安可植乎后崩內侍者見鏡奩中有瓜桃核視之涕零疑非其類耳

漢沁水公主園

竇憲傳憲恃宮掖聲勢遂曰賤直請奪沁

水公主園田主逼畏不敢計後肅宗駕出過園指以問憲

憲陰喝不得對後發覺帝大怒召憲切責曰貴主尚見枉奪何況小人哉國家棄憲如孤雛腐鼠耳憲大震懼皇后為毀服深謝良久乃得解使以田還主

漢梁冀園

梁冀傳廣開園圍採土築山十里九阪以象二

峭深林絕澗有若自然奇禽馴獸飛走其間

漢袁廣漢園

西京雜記茂陵富人袁廣漢藏鎡巨萬家僮

八九百人於北邙山下築園東西四里南北五里激流水注其內構石為山高十餘丈連延數里養白鸚鵡紫鴛鴦牝牛青兕奇獸怪禽委積其間積沙為洲嶼激水為波瀾奇樹異草靡不具植廣漢後有罪没入為官園

漢芙蓉園

述異記洛陽芙蓉園漢家置之

漢染園

漢官儀染園出支茜供染御服

魏芳林園

魏志明帝詔先帝時靈芝生芳林園中自吾建

成承露以來甘露復降芳林園魏略明帝起土山於芳

林園西北陬使公卿僚皆負土成山立松竹雜木善草於其上捕山禽雜獸置其中

魏靈禽園

拾遺記明帝卽位二年起靈禽之園遠方所獻

異鳥珍獸皆畜此園昆明貢噉金鳥帝命畜之

互詳辟寒臺

晉瓊圃園

靈芝園

石祠園

晉宮闕名洛陽有瓊圃靈

芝石祠園

晉芳蔬園 [拾遺記咸寧四年立芳蔬園於金墉城東多種
異菜名曰芸薇類有三種紫色者最繁味辛其根爛熳春
夏葉密秋藥冬馥其實若珠五色隨時而盛一名芸芝其
色紫爲上蔬其味辛色黃爲中蔬其味甘色青者爲下蔬
其味鹹常以三蔬充御膳其葉可以藉飲食以供宗廟祭
祀亦止人渴饑宮人採帶其莖葉香氣歷日不散

晉華林園

後園

[文選注]洛陽圖經曰華林園在城內東

北隅魏明帝起名芳林園齊王芳改爲華林子寶晉紀曰
武帝泰始四年二月幸芳林園與羣臣宴賦詩 [詩七月

正義]晉宮闕名云華林園中有車下李

[潘尼後園頌講

論華林肄射後園

按方輿紀要言太和元年王朗言華林天淵足展遊晏
則華林之谷由來已久非始於齊王芳也可備一說

晉春王園

[文選陸士衡詩逍遙春王園躑躅千畝田]注晉

宮閣名曰洛陽有春王園

晉金谷園

[水經注]穀水又東左會金谷水水出太白原東

南流歷金谷謂之金水東南流逕晉衛尉卿石崇之故居
石季倫金谷詩集敘余有別廬在河南界金谷澗中有清
泉茂樹衆果竹栢藥草傲翳 [通志]在府城西十三里晉
石崇因川阜造園館自作詩序內有清涼臺卽其妾綠珠
墜樓處

按水經注記金谷園在千金塢下金墉城上千金塢在今府城東北九龍臺東即古代龍渠也據是則金谷園當在今府城東而通志以為在府城西十三里與水經注大異今攷府城西有金水即李濂通志所謂金谷水水經注以為離山水又於千金渠下別言金谷水今千金渠下更無所謂金谷水在府城東者恐水經注傳寫偶誤當以李濂通志為確又按金谷二十四友首潘岳次石崇在恩陸機陸雲郭彭劉琨歐陽建杜斌王粹鄒捷崔基劉環周恢陳耽劉訥繆徵摯虞諸葛詮和郁率秀許猛劉與杜育皆一時才俊潘金谷詩云投分寄石友白首同所歸後

晉潘安仁園 潘安仁閒居賦太夫人乃御版輿升輕軒遠

覽王畿近周家園體以行和藥以勞宣

晉苜蓿園 晉書華廙既廢黜武帝後又登凌雲臺望見廙

苜蓿園阡陌甚整依然感舊太康初大赦乃襲封

晉紫微園 拾遺記懷帝末民間園圃皆生蒿棘元熙元

年太史令高堂忠奏熒惑犯紫微若不早避當無洛陽乃詔京邑諸宮觀林衛之內及民間園圃皆植紫薇以為厭勝至劉石姚符之末此蒿棘不除自絕也

晉元圃園 文選陸士衡宴元圃宣猷堂詩注楊佺期洛陽

記曰東宮之北曰元圃園

晉魏仁溥園 周氏牡丹記魏花出晉相魏仁溥園中

後魏西遊園 伽藍記千秋門內道北有西遊園

後魏百果園 伽藍記華林園景陽山山南有百果園果列

作林林各有堂有仙人棗長五寸把之兩頭俱出核細如

鉞霜降乃熟食之甚美俗傳云出崑崙山一日西王母棗
又有仙人桃其色赤表裏照徹得嚴霜乃熟亦出崑崙山
一日王母桃

後魏西林園 胡后傳肅宗朝太后於西林園讌文武侍臣
飲至日夕

隋華林園 大業雜記出上東門東十二里有亭子宮宮東
臨積潤池池東二十里有華林園

按隋移都河南出上東門計三十餘里
為華林園猶是古洛陽魏晉舊園也

隋平樂園 大業雜記車駕幸江都發藻淵日暮宿平樂園

東御園 西御園 名勝志唐東御園名獅子園西御園

名榆柳園

唐富春園 通志在府城東唐元稹白居易有詩

唐歸仁園 通志在府城舊歸仁坊因名唐相牛僧孺置宋
相李昉荆亭其中

唐婁師德園 淵鑑類函汝南袁師德故給事高之子嘗於
東都買得婁師德故地起書樓洛人語曰昔日婁師德園

今乃袁師德樓

唐太平公主園 通志在府城積德坊見京洛朝市圖

唐白居易園 樂天池上篇罷杭州刺史時得天竺石一華
亭鶴二以歸始住西平橋開環池路罷蘇州刺史時得太

亭鶴二以歸始住西平橋開環池路罷蘇州刺史時得太

湖石白蓮折腰菱青板舫以歸又作中高橋通三島徑罷刑部侍郎時有粟千斛書一車泊臧獲之習筦磬絃歌者指百以歸先是潁川陳孝山與釀法酒味甚佳博陵崔晦叔與琴韵甚清蜀客姜發授秋思聲甚淡宏農楊貞一與青石三方長平滑可以坐卧凡三任所得四人所與泊吾不才身今率為池中物矣其詞曰十畝之宅五畝之園云云

隋唐官園

名園記洛陽有嘉猷會節恭安溪園皆隋唐官園

園

宋會節園

玉海開寶九年車駕在西京幸會節園召從臣張樂宴飲景德四年宴近臣於會節園命帥臣內職飲射

宋永芳園

玉海景德四年駐蹕西京宴宗室於永芳園十五年幸會節園又幸仁浦園

宋富鄭公園

洛陽名園記

洛陽園池多因隋唐之舊獨富鄭公園最為近闢而景物最勝鄭公自還政歸第一切謝

賓客燕息此園幾二十年亭臺花木皆出其目營心匠故

透迤衡直闔爽深密皆曲有奧思

餘詳藝文下凡入名園記者同此

宋董氏西園

董氏東園

名園記董氏以財雄洛陽元豐

中少縣官錢糧盡籍入田宅城中二園因蕪穢不治

宋環溪園

名園記環溪王開府宅園甚潔

宋劉氏園

名園記劉給事園涼堂高卑制度適愜可人意

有知木經者見之且云近世建造率務峻立故居者不便而易壞惟此堂正與法合

宋叢春園

名園記門下侍郎安公買於尹氏岑寂而喬木

森然桐梓檜栢皆就行列有叢春亭先春亭北可望洛水

宋天王院花園子

名園記無他池亭獨有牡丹數十萬本

宋歸仁園

見前

宋王溥園

苗帥園

趙氏園

名園記節度使苗侯既貴

卜居河南最佳處得開寶宰相王溥園有憑陵諸園之意然猶未盡得王丞相故園水東為直龍圖閣趙氏所得亦大湖第宅園池

宋趙韓王園

名園記趙韓王宅園國初詔將作營治故其

經畫制作殆侔禁省

宋李氏仁豐園

名園記甘露院東李氏園洛中花木無不

有中有四并迎翠濯纓觀德超然五亭

宋吳氏園

名園記在唐為袁象先園本朝屬李文定公丞

相今為吳氏園有松島數百年松也其東南隅雙松尤奇

宋文潞公東園

名園記本藥圃地薄東城水渺瀰甚廣淵

映瀝水二堂宛宛在水中湘膚藥圃二堂間列水石

宋紫金臺張氏園

名園記自東園並城而北亦繞水而富

竹木有亭四

宋胡氏二園 名園記水北胡氏二園相距十許步在印山之麓纏水經其旁穿二土室深百餘尺堅完如埏埴有臺榭花木率在二室東但其亭臺之名皆不足載

宋會隱園 名園記大字寺園唐白樂天園也今張氏得其半爲會隱園水竹尚甲洛陽

宋獨樂園 名園記溫公獨樂園卑小不可與他園班讀書堂僅數十椽澆花亭益小弄水種竹尤小見山臺高不過尋丈釣魚菴採藥圃又特結竹梢落蕃蔓草爲之其所以爲人欣慕者不在於園耳

按元城語錄溫公營獨樂園園丁呂直性愚公以直名之春時人遊園丁得茶湯錢十千園丁日與主人分之

一日來納公公曰此汝錢可持去再三欲留公怒遂持之顧曰只端明不愛錢者後十許日公見園中新創一井亭問之乃前不受十千所創也

宋湖園 名園記洛人云園圃之勝不能相兼者六務宏大者少幽邃人力勝者少蒼古多水泉者難眺望兼此六者惟湖園而已予嘗游之信然在唐爲裴晉公宅園園有百花洲四并堂桂堂迎暉亭梅臺知止菴環翠亭翠樾軒

宋呂文穆園 名園記呂文穆園在伊水上流木茂而竹盛有亭三一在池中二在池外橋跨池上相屬也

宋楊侍郎園 名園記楊侍郎流杯水雖急不旁觸爲異

宋師子園 名園記師子園師子非石也入地數十尺或以

河南府志 卷之六十二 園圃
地攷之蓋武帝銷鑠不盡者也

宋李氏園 蘇子由記李侯家世名將謝居洛陽引水植竹求山谷之樂雖洛陽大家世族未易以園圃相高也

宋靳氏圃 周氏牡丹記靳黃出靳氏之圃在姚黃之前

宋閔氏圃 牡丹記閔黃類甘草黃出閔氏之圃

宋銀李圃 牡丹記女真黃二色紅元豐中並出銀李園中

大尹潞公見而賞異之命今名洗妝紅亦生銀李園山麓中劉公伯壽見而愛之命今名

宋袁氏圃 牡丹記感金樓子雖魏花不及生袁氏圃

宋神御花園 牡丹記雙頭紅雙頭紫皆並蒂如鞞而不相

連屬惟應天院神御花園中有之

唐午橋莊 宋史張齊賢傳齊賢歸洛得裴度午橋莊有池

榭松竹之盛日與親舊觴詠其間 窮幽記裴晉公午橋

莊小兒坡茂草盈里晉公每使數羣羊散於坡上曰芳艸

多情賴此粧點

唐平泉莊 劇談錄李相國宅平泉莊去洛城三十里卉木

臺榭若造仙府有虛檻對引泉水縈迴穿鑿像巴峽洞庭

十二峯九派迄於海門皆隱隱見雲霞龍鳳草樹之形人

有題平泉詩曰隴右諸侯供語鳥曰南太守送名花 賈

氏談錄贊皇公平泉莊周圍十里構臺榭百餘所今基址

猶存天下奇花異艸珍松怪石靡不畢致其間故德裕自製平泉艸木記今悉蕪紀唯鴈翅檜珠子栢蓮房玉藻等蓋僅有存焉怪石名品甚衆多爲洛城有力者取去唯禮星石及獅子石今爲陶學士徙置梨園別墅河南志河南長殿南有婆婆亭貯奇石處世傳李德裕醒酒石以水沃之有林木自然之狀今謂婆婆石蓋以樹名

按雲林石譜平泉石出自關中產於水每獲一奇皆鑄有道二字余於潁昌杜欽蓋家賞一石雙峰高下無箴空岩竇磨礪光潤而青堅於石罅中鑄有道二字又平泉醒酒石爲玉清昭應宮所取昭應焚仁廟裂其地陽濮潞潭越韓冀王冀之子丹陽郡王守節得其園地發土得奇石前後幾萬塊多奇偉擎天醒酒石居其一上有文饒刻字云韞玉抱青輝間庭日瀟灑塊然天地間自是孤生者長慶癸卯歲二月景戌題紹聖中有旨輦

其石歸禁中後丹陽裔孫密訪醒酒石在云今置石殿中矣見張右丞徵澹岩集

宋大隱莊洛陽名園記大隱莊梅蓋早梅香甚烈而大說者云自大庾嶺移其本至此以上俱洛陽

河南府志卷之六十一終

海國圖志卷之六十一

大島嶼

海國圖志

